

# 觀彌勒菩薩上兜率天經贊

大慈恩寺基撰



## 觀彌勒菩薩上兜率天經贊

A01 序經文 .....	21
B01 佛成權實 .....	21
B02 慈氏所因 .....	36
B03 時分有殊 .....	43
B04 往生難易 .....	48
B05 問答料簡 .....	55
A02 釋經文 .....	63
B01 說經因起分 .....	63
C01 說經通所因 .....	64

D01	如是我聞	65
D02	說教時分	76
D03	說法教主	79
D04	說法處	80
D05	教所被機	83
E01	放光集眾	83
F01	放光	84
G01	明化主世尊	84
G02	明時在初夜分	85
G03	明處舉身	85

G04	明神變放光	86
G05	明相狀金色	86
G06	明化境	86
F02	明雨花	87
F03	化佛說言	88
G01	化佛	88
G02	皆唱	88
G03	顯因	89
G04	明果	89
E02	矚光眾集	90

F01 四眾集 .....	90
G01 苾芻眾 .....	90
H01 耆舊尊宿眾 .....	90
H02 少欲杜多眾 .....	93
H03 神通外化眾 .....	97
H04 智慧內德眾 .....	99
G02 苾芻尼眾 .....	101
G03 近事男眾 .....	102
G04 近事女眾 .....	103
F02 二眾 .....	103

F03 八部眾 .....	105
C02 說經別所緣 .....	107
D01 出舌放光 .....	107
D02 有多化佛 .....	110
D03 化佛說法 .....	110
E01 總 .....	111
E02 別 .....	112
D04 釋迦自陳 .....	113
D05 彌勒領悟 .....	113
E01 明領悟 .....	114

E02 明請記 .....	114
B02 發請廣說分 .....	115
C01 辯外果 .....	115
D01 波離啟請 .....	115
E01 明請軌 .....	116
E02 明陳請 .....	117
F01 舉昔生今問 .....	117
F02 顯今徵後問 .....	118
G01 舉今徵後生之處所 .....	118
G02 舉今徵後生處淨穢 .....	119

D02	世尊廣答 .....	120
E01	勅聽許說 .....	120
E02	依問具申 .....	122
F01	答生處 .....	122
F02	答淨穢 .....	122
G01	正答淨穢 .....	123
H01	五百億天子造外眾寶宮 .....	123
I01	諸天植因發願 .....	123
I02	天願果遂 .....	128
I03	龍王守護 .....	135

H02 一大神造法堂內院	136
I01 發願	136
I02 明所願果遂	138
I03 諸天覩勝 發願往生	149
H03 五大神於內院外宮種種嚴飾	149
I01 標	149
I02 顯	150
G02 結此所因歎處勝妙	153
H01 結因	153
H02 歎勝	154

D03	結勸生彼 .....	155
E01	示生彼人 .....	155
E02	教生彼行 .....	157
E03	結成正觀 .....	157
C02	明內果 .....	158
D01	啟請 .....	158
D02	廣答 .....	159
E01	答此沒 .....	159
F01	命終年月 .....	159
F02	涅槃處所 .....	162

F03	入滅形相	163
F04	終後生相	163
F05	舍利形相	164
F06	圓光神異	164
F07	天人供養	165
E02	答生彼天	165
F01	生處	165
F02	生相	166
F03	身量莊嚴	167
F04	異聖神變	168

F05	相好光明	168
F06	說法利益	183
G01	陳所說	183
G02	明利益	184
G03	顯佛常業	184
E03	下生時節	184
E04	總結	188
D03	勸生於彼	188
E01	勸生彼行	188
F01	明三品往生	189

G01	上品行生 .....	189
H01	示六事法 .....	190
H02	教其迴願 .....	191
I01	歎業勝 .....	191
I02	明稱念 .....	191
I03	明迴願 .....	192
H03	明正往生 .....	192
H04	諸天讚勸 .....	193
I01	作樂散花 .....	193
I02	讚歎 .....	193

I03 勸歸依 .....	194
H05 生彼利益 .....	194
I01 滅罪 .....	194
I02 獲得 .....	195
H06 總結成上 .....	195
I01 得上生 .....	195
I02 隨下 .....	196
I03 值賢劫佛 .....	196
I04 值星宿劫佛 .....	196
G02 中品行生 .....	197

H01 明敬喜，發願往生 .....	198
H02 明不願生，聞名亦利益 .....	198
I01 無惡 .....	199
I02 有善 .....	201
G03 下品行生 .....	202
H01 悔歸罪滅，修行往生 .....	202
I01 罪滅 .....	202
I02 修行 .....	203
I03 往生 .....	203
H02 見得不退 .....	204

H03 未來值佛 .....	205
F02 明有歸依不退，當得度脫 .....	205
F03 示歸生者，滅罪多少 .....	206
G01 明樂生，業滿得生 .....	206
H01 令念 .....	207
H02 勸行 .....	207
H03 教願 .....	207
H04 滅罪 .....	208
I01 逢緣駐想 .....	208
I02 聞名起敬 .....	209

I03 禮拜投誠 .....	209
G02 明不樂生，業力未滿者 .....	211
E02 眾發希願 .....	212
F01 眾發希願 .....	213
G01 明威儀 .....	213
G02 明發願 .....	213
F02 佛記得生 .....	214
E03 結成正觀 .....	214
B03 聞名喜行分 .....	215
C01 問 .....	215

D01 讚說隨喜 .....	215
D02 正問持名 .....	215
C02 答 .....	216
D01 答受持 .....	216
D02 正答持名 .....	217
C03 時眾獲益 .....	217
D01 聖益 .....	217
D02 凡益 .....	218
C04 喜退流通，得未曾有 .....	218

## 觀彌勒菩薩上生兜率天經題序

大慈恩寺基撰

原夫性質杳冥，超蹄象而含總。覺體玄眇，絕視聽而融貫。

方智雲法縠月，察神理而猶迷。假慧仞於叢筠，揆靈機而不測。

至道圓而粹容顯，實際彰而真識淨。

然後，俯提十地，疎海目於寶方。下控三乘，挺仙儀於垢城。

若鴻鍾之虛受，應物扣以騰聲。譬咬魄以激暉，循器清而肆影。

故有紹隆報佛，即灌頂於甄臺。纂業化身先貽神於紺殿，撫根熟而趨座，待生機而降跡。

斯乃三際受職之宏儀，一生補處之靈範者也。

今此經者，灑群萌之一雨，濟眾獸之通津，運弱喪之大舟，引炎童之妙輪。

雖復探幽曉祕，歸乎異線之花。然而拯溺符機，實在此筌之葉。

所以金光夕燭，旗有景於昏徒。芳藹前霧，表無虧於後實。

妙祥之儔波菱，鶯子之輩雲趨。雖則稟訓一時，實乃津梁千祀。

若夫天宮聖境資莫限之因嚴。覺苑神幾叶無彊之德履。

匪心樞而攬觀，豈語極之揚光？教府自陳，題衡息讚。

觀彌勒菩薩上生兜率天經者，六事齊修，二因兼積。心勤妙境，欣趣日觀。

彌勒，梵音，此云慈氏。母志悲纏蠢類，子性恤及懷生，宿願今誠俱以標號。

道圓上果，跡履下因。祈覺運生，假稱菩薩。

上生，即往昇。兜率，言知足。自在光潔神用，名天。

此由補處，天宮端居利他。祈心住觀，必獲瞻奉。

經者，攝也、貫也、常也、法也。生資教攝，永絕樊籠。理藉文貫，長離散滅。百靈常軌，千葉良規。利物詮真，目為經也。

## 南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

## 觀彌勒菩薩上兜率天經贊

### A01 序經文

聊以五門分別：

①佛成權實，②慈氏所因，③時分有殊，④往生難易，⑤問答料簡。

### B01 佛成權實

權，謂隨宜接物；實，謂究理往真。佛之身說，皆有此二。

《法花經》為引不定性，云：唯此一事實，餘二即非真。顯一乘教為實，二乘教為權，即《涅槃經》半滿教也。

《勝鬘經》中明決定義，云：若如來隨彼意欲，而方便說，唯有一乘，無有二乘。即唯說有一乘為權，說有四乘為實。謂：大乘、獨覺、聲聞，及無聞非法眾生，以人天善根而成就之。教既如是，身亦復然。

《金剛般若經》云：

若以色見我 以音聲尋我 彼生履邪斷 不能當見我

彼如來妙體 即導師法身 妙體不可見 彼識不能識

其論又云：

應化非真佛 亦非說法者 說法不二取 無說離言相

以法身為實，二身為權。

《法花經》中，執糞器而著垢衣，喻權身也；現壽量而無邊際，顯實身也。

此以受用為實，化身為權。

然，此三身有二四句：

①有報非化，謂自受用身。

②有化非報，謂現八相身。

③有報亦化，謂他受用身。多受法樂，可言受用。隨機而現，可言變化。

④有非報化，謂佛法身。

復有四句：

①有報非化，謂自受用身。

②有化非報，謂隨生類六趣，化身長者居士、猿猴、鹿馬、種種之身。

③有報亦化，謂他受用及八相身。前變化身，亦此句攝。

④有非報化，謂佛法身。

雖此四句說身不同，權實二德，總皆攝盡。略有二種：

①法身稱實，餘二並權。實者，諸法體真；權者，事相權迹。《般若論》云：應化非真佛等是。

②法身及自受用，唯佛與佛乃能知之。是身之本，俱離差別。功德智慧，一一無邊，不可以色形量而取，都無分限起盡之相，具真實德，修證實成，非應物現，名之為實。

他受用身及八相化身，隨生類所示現身，可令下類皆知見是身之末，俱有差

別。功德智慧非並無邊，可以色心形量而取。然，有分限起盡之相。具相狀功德，因利他取起，應物而現，名之為權。

《佛地論》云：佛身有二：①實身，②生身。然此實身各居自土，俱遍法界非方處求，法身本有，諸佛共同。凡由妄覆，有而不覺，煩惱纏裹，得如來藏名。由近善友，斷妄生死，出纏裹時，具法身之稱，諸功德法所依止。

《勝鬘經》中，在纏名如來藏，出纏名法身。約位因果得名別，故但可說證，不可說成。初地以上分亦證得，佛果圓證。自受用身新修所起，有情分別事體異故。從凡夫位，但有無始無漏種子，由近善友，聽聞正法，種子漸增，為報身本，亦名如來藏。

《楞伽經》云：阿梨耶識名空如來藏，具足熏習無漏法，故名不空如來藏。

前法身藏，此報身藏。發心修行，如《幽贊》說。在地前位，唯修種子令漸增長。由此勢力，令有漏善業生，生當感報，相好圓滿，生於八相。變化土中，至初地上，便資有漏，得十王位。生生常得三十二相、八十隨好，然未無漏，亦未圓明。唯有六七二識無漏，生他受用，隨類土中。

《梵網經》說位大小，金剛道後，有漏皆滅，無漏五蘊，一切圓明。捨無常色，獲得常色。受想行識亦復如是。獲得無漏三十二相八十隨好，盡未來際，相依相續。然，諸菩薩受變易身，有從初地即受變易，如入滅定怖煩惱故。有終乃至七地滿心方受變易，如入滅定不怖惑故。其變易身，一得不捨，覺其勢盡，還入定資，乃至金剛轉位方盡。由此七地滿心之中，直往菩薩，便生第四靜慮廣果天中。避五淨居不生彼，故資此下地感現身業，乃至十地數數資助將

至金剛，遂往色究竟上妙淨土中。

《花嚴經》云：有妙淨土，出過三界，第十地菩薩當生其中。生者，起也，往也，住也。

《十地》云：現報利益，受佛位故。後報利益，摩醯首羅智處生。故《瑜伽》第四，《解深密經》、《對法論》等皆作是言：超色究竟有妙淨土，十地菩薩方生其中。有十相現，大寶花王出，菩薩坐中而成正覺。金剛心位，身猶有量，猶是因位有漏皆是在，至解脫道，身遂無邊，既名果位，無漏圓滿。此所修生無漏果身等法，身量智境兩如，事理相稱皆無分量，不可相求，故名為實。彼二權身，各有差別，隨宜即現，方處可求。只如他受用身，為初地菩薩現，由彼菩薩悟十百門，能見百佛。一佛即是一佛所王三千大千，此理即是百

億化身。一佛化同，故言一佛。雖見百佛，總一受用。此受用佛，坐百葉花。一葉即是百億化身一佛土也。此一佛土，地前所見，為彼所現，身稱彼土，然有二類：①一四天下所現之身，②三千界中同一主佛。由彼地前有階降故，初地所見他受用身稱百葉花，不大不小，初地菩薩隨侍彼佛，大小相稱，然彼地前隨生何界身隨小大多等佛半。初地以往，既證真如，現生無漏，功德漸勝，相好轉明，故所感身，稱佛大小，分段變易，粗細有殊，功德力資，身量必大。於十王位為此洲王，隨類化生，感受不受故。此身量亦復不定，正智證真如，後智見彼佛，如十百門一一宣說。若至二地，得千法門，見受用身坐千葉花，一一葉中百億化佛，其佛處坐，大小相稱，菩薩隨侍，身量亦爾，如化弟子，侍佛大小。

《梵網經》云：我今盧舍那，方坐蓮花座，一花百億國，一國一釋迦，各坐菩提樹，一時成佛道。

如阿彌陀佛，眼如四大海水，眉間毫相如五須彌山。

《法花經》亦云：

眾生見劫盡 大火所燒時 我此土安穩 天人常充滿

常在靈鷲山 及餘諸住處 說是《法花經》

皆他受用，隨大小菩薩所宜，便現身量不定，現處亦爾。非唯淨土色相有殊。感處、便，或在西方，或在此處。只如妙吉祥所見，乃是他受用身；舍利弗所見，即為化身。故，花嚴會，舍利弗如盲如聾、不聞不見。文殊師利引出會已，方始知見。後得所觀，即是權身；正智所證，即是實身。若第十地菩薩

將成佛時，必往色究竟上大自在天妙淨土中，大寶花王坐中而取正覺。此大寶花王，量等十阿僧祇百千三千大千世界。十地菩薩坐中，大小相稱，況此所見他受用佛。彼佛身量，無量無邊。此處定在色究竟上，如前所引經論等文。然此等土，必無二乘、女人、黃門、惡趣等生。設有，皆是佛及菩薩之所化作。

《無量壽經論》言：女人及根缺，二乘種不生。

《佛地論》云：設有鸚鵡等莊嚴道場，皆佛菩薩為令他方菩薩來生喜心，所以化作。

《鼓音王經》云：阿彌陀佛，父名月上，母名殊勝妙顏，子名月明，奉事弟子名無垢稱，魔王名無勝，調達名寂。既無女人，母非實女，佛等所化，如命命等。故是報土，亦不相違。有解是實，女人者化。阿彌陀佛有報佛土；螺髻

所見，劫盡常在靈山說法，是報佛土。

《花嚴》云：摩耶夫人腹中三昧見腹含容，無邊世界諸大菩薩集會聽法。故知報佛有化父母，此亦未爽。

《觀世音授記經》云：阿彌陀佛，壽命無量百千萬億劫，當有終極。滅度之後，觀世音菩薩，明相出時，於七寶菩提樹下成等正覺，號普光功德山王佛，國土勝阿彌陀佛國百千萬億，不可為比，國名眾寶普集莊嚴。此佛滅已，大勢至成佛，名善住功德寶王佛。不說先住何方，後來補處。不同化佛，然於此處補處，無失化處，欲令欣樂心深，所以先有住處。其他受用，即以花臺為道場坐，下位有父母，上位不見父。且如化身為地前菩薩二乘等現，或淨或染、或小或大，任物所宜，將成佛時，先昇知足，以彼天處機宜相稱，厭苦心深，生

死樂具，已知足故，不處餘天，必在於此，只如釋迦、彌勒，處知足天。

《菩薩處胎經》說：具足五十六億七千萬歲下生，根熟方下成道，三際成道，皆有道樹金剛座道場降魔等事。其降魔不同，如理趣疏。金剛聖道，二障已拂，解脫道中，無漏道備。冥真契德，證覺利生已，故名成佛。今此上生經明成佛事，非法身佛，理但可證，非有上下生成等義，亦非自受用。彼無處天成佛之相，說法利生，令生見義。他受用佛不處天宮，不住摩竭提，令地前見故，即是化身。上生成佛，雖標化佛，影彰餘身，自受用身，圓成道果。真如妙理，障盡圓證。自利果滿，宿願須行。當此會中，化生權起，他受用佛。應十地所宜變化佛身，隨地前所現。雖復此處彰化體，而影顯餘佛。見者自成機別，現者身亦說，殊非實佛，身有其異體。如月出雲際，圓朗徹空，影現水

中。水月圓明任器，器成萬別，月本一同，豈以影有千差，遂令月亦有異，真權兩體，義理必然，真即理源，權隨物迹，故知上生成佛，備彰化質，欲令隨類濟生欣修易。

《鉢經》說：彌勒語文殊師利言：如我後身作佛，如恒河沙等文殊師利，不能知我舉足下足之事。

《鶖掘摩羅經》言：北方有國名曰常喜，佛名歡喜藏摩尼寶積，文殊師利即彼佛也。文殊既是佛，不知彌勒者，故知化也。

《攝大乘》等八相成道，既是化身，故知上生，定非真佛。

菩薩有三：①一生所繫，②最後之身，③坐於道場。

上生則一生所繫，下生局得二身，成佛由因，故三皆盡。唯化佛有，餘不見

文，以理而推，亦應通有。如第七地菩薩，唯此一身，即受變易，名一生所繫。八地以上名最後身，無別分段生死相故。往大自在宮，坐蓮花座，名坐道場，此名成自受用身，亦有三菩薩，他受用身，理亦如是。觀音之身，名最後身，其坐道場，一生所繫，未見誠證，理必定有。說彌勒菩薩名一生者，住在人中，名一生。一大生故，如七生等，據實并中，有合有四生，若說天中唯有半生。并中有二生，《大智度論》說為三生。設在人中，除成佛身，故有三也。

然，諸菩薩有五種生：

①除災生。由願自在，為大魚等，濟諸飢乏；為大醫王，救諸疾病；為大善巧，善和鬥諍；為大國王，如法息苦；為大天神，斷邪見行；為火為水、為乘

為舟、為種種物，息除災患。

②隨類生。願自在力，於傍生等惡類中生，彼所行惡，而自不行；彼不行善，而自行之；如入酒肆，能立其志；入諸婬舍，示欲之過，為說正法，除彼過失。

③大勢生。稟性生時，壽量形色、種姓富貴、最為殊勝，能斷眾生輕慢等過。

④增上生。受十王果，自在化導，隨所應示。

⑤最勝生。此生資糧已極，圓滿如釋迦等，生剎帝利大國王家，能現等覺，作諸佛事。

今者，彌勒住觀史多天，具後四生，或二三四。若下此洲，第五生攝。此即

第一，佛成權實也。

## B02 慈氏所因

依正梵本，應云梅呬利耶，此翻為慈。古云彌帝，疑或云彌勒者，皆語訛也。

依《賢愚經》第十六卷云：生波羅奈國劫波利村，輔相之家。即《上生經》云：劫波利村波婆利大婆羅門家初生，便有三十二相、八十隨好，身紫金色，姿容挺特。輔相歡喜，召相師相之。相師既見，轉讚其善。因欲立名，方問生時之相。父答之言：其母素性不調，懷子以來，慈矜苦厄。相師占曰：此即兒志。因為立號名梅呬利耶。若釋此名，應云梅呬利曳尼，梅呬利尼，是女聲。母性慈故，因名慈氏。父母愛重，聲譽遠聞。王梵摩達心惱生懼，恐奪其國，

伺其未長，方欲降之。內人既知，潛報父母，私送舅氏，避難習業。舅名波羅利，領五百弟子，異方學道，舅甥師弟，聰穎超群，數歲之間，學通經典。舅後聞佛出世，遣慈氏等一十六人往至佛所，而為四問：①問幾相，②問年齒，③問弟子，④問種姓。慈氏問已，如來具答。慈氏歡喜，佛因更化餘十五人，得法眼淨。俱從坐起，並乞出家。佛言：善來！衣嚴髮落，方便更說並成應果，唯有慈氏不預彼流。後從世尊遊迦維羅衛國，其大愛道手自縵績金氎袈裟，繫想奉持。世尊不受，令供養僧。僧中次行，無敢取者，到慈氏所，尋為取之。身披金氎，從佛遊化。身紫金色，衣貫金彩，表裏相稱，巡行乞食。持鉢巷陌，觀者無厭。雖皆敬歎，無與食者。有穿珠師將還供養，婦來瞋罵，言失穿珠之利。慈氏得珠，持還問眾人。廣說過去供養所生福利。佛因無滅，說

過去事，便說未來慈氏之事。慈氏後作佛，故猶名慈氏。

慶喜問佛慈氏名因。佛言：過去此瞻部洲，有大國王，名達磨流枝，此云法愛。爾時，有佛號曰弗沙。有一比丘入慈三昧，身相安靜，放光照耀。王問：此僧何定致此？佛言：入慈定。王倍生欣躍云：此慈定巍巍乃爾，我當習之，生生不絕。往法愛王者，今慈氏是。從彼發意，常號慈氏，久習性成，佛稱彌勒。

又《一切智光明仙人慈心經》說：佛在摩伽提國寂滅道場彌加女村自在天寺精舍，一時佛與千二百五十比丘，經行林中。彌勒菩薩金色相好，放銀光明，黃金校飾，如白銀山，來至佛所，結髮梵志五百人等，遙見彌勒，五體投地，白佛：請問彌勒光明乃與佛等，於何佛所初發道心。佛言：梵志！乃往過去無

量無邊阿僧祇劫，時有世界，名勝華敷，佛號彌勒，恒以慈四無量法教化一切，經名《慈三昧光大悲海雲》。聞者必超百億劫罪，成佛無疑。時有大婆羅門，名一切智光明，六十四能，多智博達。聞佛彼經，即生難詰，不能屈伏，便發信心，而發願言：願持彼經，必得成佛，號曰彌勒，即捨家入山谷，長髮梵行，滿八千歲，乞食誦經，時有星現，表王姪荒，彗星橫流，洪水不止。不得乞食，七日空住。時林中有五百白兔，有一女兔母子，見仙無食，而作是言：仙人為法，不食多日，法山將崩，法海將竭，我今為法，應不惜命。便告諸兔：諸行無常，眾生愛身，未曾為法喪捨身命，今者欲為生類作大橋梁，供養法師，令法久住。即說頌曰：

若有畜生類 得聞諸佛名 永離三惡道 不生八難處

若聞法奉行 生處常值佛 信法無疑惑 歸依賢聖僧

隨順諸戒行 如是疾得佛 必至大涅槃 常受無上樂

說此偈已，告諸兔言：我今以身，欲供養法，汝等隨喜。我從多劫，三毒所使，為鳥獸形，虛受生死，今將為法，棄捨身命。時，山樹神為積香木，兔王母子繞仙七匝，白言：大師！我今為法，供養尊者。仙人告曰：汝是畜生，此心難辦，兔言：我今身供養者，為法久住，饒益眾生。王語其子言：汝可隨意求覓水草，繫心思惟，正念三寶。子聞母告，跪白母言：如尊為法欲供養者，我亦願樂。即投火中，母亦隨入。當爾菩薩捨身之時，大地振動，天雨諸花，持用供養。肉熟之後，諸神白仙：兔王母子為供養故，投身赴火，今肉已熟，宜可食之。仙聞神言，悲不能對。以所誦經書置樹葉，而說偈言：

寧當殺身破眼目 不忍行殺食眾生 諸佛所說慈悲經 彼經中說慈悲者  
寧破骨髓出頭腦 不忍啖肉食眾生 如佛所說食肉者 此人行慈不滿足  
當受短命多病身

仙發誓言：願我世世，不起殺想，恒不啖肉，入慈三昧，乃至成佛，制斷肉戒。語已，投火而死，與兔母子併俱時命終。地六種振動，天神之力，樹有光明，金色晃曜，照千國土，眾生見光，尋光來至，見仙與兔俱死火中。得所說偈并佛經已，持還上王。王遣遍宣令聞，皆發大菩提心。

佛告梵志：時，兔王者，今我身是。其兔兒者，羅睺羅是。誦經仙人者，今彌勒是。五百兔者，大迦葉等五百人是。山樹神者，舍利弗、目犍連等二百五十人是。時，千國王者，今跋陀波羅等千菩薩是。彼國眾生得聞法者，賢劫佛

所得道者是。由是，菩薩乃至成佛，猶名彌勒，其所說經，亦名《慈三昧光大悲海雲》。此說初時《賢愚經》說弗沙佛時，乃近代也。欲顯生生常習慈行，相師立名，遠符往性。今古合稱，故名彌勒。

若依此，姓名為慈者，應云梅坦利曳那，梅坦利那是男聲，自性修慈故，稱男也，婆羅門種，姓有眾多。其此慈者父王本姓，父姓母姓俱有慈，故名為慈氏。

又，有云：慈氏，本姓頗羅墮，字阿氏多。又，王姓頗羅墮，字阿氏多。字理無差，姓成乖角。其彌勒者，母及自性俱行慈愛，因以為名，由是得號，是心行性，亦種姓也。如釋迦是姓，牟尼是號，一切義成是名，喬答摩是皇。如此立姓之所生聖也，是名第二慈氏所因。

### B03 時分有殊

劫有多種，如別章說。

《觀藥王藥上菩薩經》云：爾時，釋迦佛告大眾言：我曾往昔於妙光如來末法之中，出家學道，聞是五十三佛名，心生歡喜，復教他人。他人聞已，轉轉相教。乃至三千人，異口同音，稱諸佛名，一心敬禮，即得超越無量億劫生死之罪。其初千人者，花光佛為首，下至毘舍佛，於過去莊嚴劫中得成為佛。毘舍佛者，即七佛中第三毘舍浮佛。此中千佛，拘留孫佛為首，下至樓至如來，於賢劫中得成為佛。後千佛者，日光如來為首，下至須彌相佛，於未來星宿劫中當得作佛。

《賢劫經》亦云：過去莊嚴劫，有千佛出現世間。文皆同此。其三千佛復各

自類同修勝業，俱時獲果，故別類出。

《無垢稱經》第六卷云：過去輪王，名為寶蓋，今寶焰如來。輪王千子，今賢劫千佛。月蓋王子，今釋迦是。

《五濁經》云：今當賢劫第九住劫，已有四佛，人壽四萬歲，迦諾迦村陀佛出世。人壽三萬歲，迦諾迦牟尼佛出世。人壽二萬歲，迦葉波佛出世。

《賢劫經》云：人壽一千二百歲，釋迦始生都史，人壽一百歲，出世作佛。都史天壽四千歲，人間當五十六億七千萬歲。正法五百年，像法一千年，不論末法，仍云過千五百年後，釋迦法盡，獨覺行化，與諸經不同。人命轉促，正法之時，人壽不減。像末法中，人壽便減，至三二十歲，有飢饉、疫病、刀兵次起，人多死盡，國界空疎，仙人相誡，人懷其善。子年倍父漸漸長壽，至八

萬四千歲。從增六萬歲至增八萬。皆有轉輪聖王相次而出。八萬歲時，王名儻佉，彌勒方出。

然論釋云：劫減佛興，劫增轉輪王出。以此檢，彌勒八萬四千劫初減方出。厭生死故，人壽百歲，慈氏生天。人壽八萬四千，方始下生成佛，當人間五十六億七千萬歲。以此而推，劫減時長，劫增時短。慈氏光照四十里。

《梵志經》云：父名梵手，母名梵經，子曰德力，侍者曰海氏，智慧弟子曰慧光，神足弟子曰賢精進。正法八萬歲，收佛舍利，共興一大塔寺。

《賢劫經》云：從迦諾迦村陀佛至第九百九十九佛共出一大劫，第一千樓至佛獨出一劫，後更十二劫空過無佛。後有一佛，名淨光補王，壽十小劫，即是星宿劫中，第一日光佛也。翻名有異，體即一佛。過此以後，三百劫中空過無

佛。

《樓炭經》中，明樓至佛獨出一劫所由，廣如彼說。

《金剛力士經》云：昔，有輪王，千子具足，各發勝心，共求作佛。父王試子，何者先成佛。香水浴籌，令千子取，得第一者，即最初成，最後得者即最後成。其最後者，為餘者譏，我等成佛，人已化盡，汝何所度。小子悲泣，復思惟：世界無邊，眾生無數，諸兄所度，何能盡也。願我作佛，度人、壽命，一等諸兄。岌然地動，佛即咸記。由是因緣故，後一佛獨出一劫，以啼泣故名啼泣佛。和上解云：胡盧支故，盧支者，此翻云父，愛父小子偏所愛念故為名也。於是，諸兄願作金剛，擁護小弟。

依小乘說，菩薩百劫修相好業。釋迦買五花以供養定光，定光即燃燈也。遂

為授記，汝於來世當得作佛。

又由釋迦、彌勒同事弗沙，世尊入火光定，威光晃曜，釋迦讚歎，復超九劫故，先彌勒以得菩提故，經數說。

彌勒自言：我寧千阿僧祇劫都史天說法度人，不能昔時捨身少分。以稽留故，在後成佛。然，釋迦佛百劫修相好中，九十一劫中第一劫逢毘鉢尸佛；第三十劫逢尸棄佛、鞞濕婆佛；第九十一劫逢賢劫千佛。

有云：住劫中初五劫無佛出世，第六劫有俱留孫佛，第七劫有俱那含牟尼佛，第八劫有迦葉佛，第九劫有釋迦，第十劫有彌勒。

有云：四佛並第九劫，四已出訖，并前即為七佛也，彌勒當賢劫第五佛也。即是第三時分有殊。

## B04 往生難易

西方天親《淨土論》、無著《往生論》，俱言：報土，女人及根缺，二乘種不生。

《阿彌陀經》云：非少善根因緣而得生彼。又言：其中皆是阿鞞跋致諸大菩薩。

《觀經》云：

- ①上品上生，得無生法忍，須臾之間，遍十法界，奉事諸佛，即得受記。
- ②上品中生，經一七日，得不退轉。經一小劫，得無生忍。
- ③上品下生，經三七日，其花始敷，了了方聞說法音聲。經三小劫，住極喜地。

- ④中品上生，應時即得阿羅漢果。
- ⑤中品中生，經七日花開，得須陀洹。逕半劫已，成阿羅漢。
- ⑥中品下生，過七日已花開，遇二大菩薩說法。逕一小劫，成阿羅漢。
- ⑦下品上生，經七七日花敷。經十小劫，具得百法明門，得入初地。
- ⑧下品中生，經六劫，蓮花乃敷，聞二菩薩說法，發無上道心。
- ⑨下品下生，經十二大劫，蓮花乃開，聞說法已，方發道心。

《百法明門》說初地得，豈阿羅漢勝初地耶？又，中品生得阿羅漢，下品始發心，即迂會者勝直往耶？又言得須陀洹等，豈由片時修故遂便得果，處處皆說阿羅漢果。若練根者六十劫成，豈由小善遂超生死，成利根阿羅漢。又云：作諸觀成，得生西方，豈舉心已，諸觀便成。若由小善，便得果者，便同說假

部，由福故得聖道，道不可修，道不可長。觀無相等資糧加行，便徒施設。

《無垢稱經》云：若諸菩薩行于八法，行無瘡疣，方生淨土。

- ①思於有情，恒作善事，不希善報。
- ②思代有情受苦，所有善根，悉迴施與。
- ③思於有情，其心平等，心無罣礙。
- ④思於有情，摧伏憍慢，敬愛如佛。
- ⑤信解未聞經典，無疑無謗。
- ⑥於他利養，無嫉妬心；於己利養，不生憍慢。
- ⑦調伏自心，常省己過，不譏他犯。
- ⑧恒無放逸，當尋善法，精進修行菩提分法。

豈生淨土者皆具八法也。

《對法》第十二卷云：別時意趣者，如說若有願生極樂世界，皆得往生，意在別時。

《攝大乘》云：譬如一錢，而得千錢，意在別時，非唯由發願即得生。

又云：對治祕密者：

①治輕佛。

②治輕法故，說我於爾時曾名勝觀如來等，與彼法身等無差別。故《法花經》云：我成佛道以來無量無數劫等皆是。

③對懈怠故，作如是言：若有願生極樂世界，皆得往生。

④對治小善生喜足故，於一善根，或時稱讚，為令歡喜，勇猛修故，或時毀

皆。

⑤治貪行者，稱讚淨土富樂莊嚴。

⑥治慢行者，稱讚諸佛或有增勝。

⑦為除悔惱障修善法，說如是言。於佛菩薩雖行輕毀，然彼眾生亦生天趣。

⑧為除不定性，於聲聞等下劣意樂，說大聲聞當得作佛。

又說一乘，更無第二。又佛毫相如五須彌，豈凡地前能見此相身量，大小可得。初地所見，凡若能見，皆為超越。

又，念阿彌陀、彌勒功德，無有差別。現國現身相成勝劣，但以彌勒惡處行化，慈悲深故；阿彌陀佛淨土化物，慈悲相淺。

又，淨土多樂，欣生者多，厭心不深，念令福少，非奇特故。惡處多苦，欣

生者少，厭心深重，故念佛多。甚希奇故，雖知佛力，念亦可生，聖教不同，屢生心惑。知足天宮，同在此界。外道、內道、大乘、小乘，所共信許。既是化身，決定得生。由此經文，四眾行六事法，八部聞名歎喜，造諸惡業，懺悔歸依，修十事行，迴願生彼，一切皆得。

《菩薩處胎經》第二卷云：彌勒初會，九十六億受我五戒者；次九十四億受持三歸者；後九十二億一稱佛名者。故知微善迴向，皆是往生成佛。經中說由十一業來生我所：一，謂讀誦分別決定修多羅、毘尼、阿毘曇，為他演說，讚歎義味，不生嫉妬，教於他人令得受持，修諸功德，來至我所。乃至第十一，或有恩愛別離、朋黨爭訟，極大苦惱，以方便力令得和解，修此功德，來至我所。故知不由唯修勝業方始得生，諸教共同，必無異說。

或有釋言：生西方者，決定不退。生兜率者，或可有退，故不願生。理亦不然。此經亦言：諸有敬禮彌勒如來，聞名稱名，暫覩豪光，下至聽聞彌勒所說一句法義，歸依生彼，定不退於無上正覺。無量劫罪，皆盡消滅。無量善法，運運生長。故見彌勒，得生彼所，雖有天女種種侍衛，或佛菩薩所化為，或實天女，彼聞能說不退之法，厭欲過患，必無退轉，佛力所加，心生決定，豈由欲界即皆退耶。位至不退，處處皆不退。未至不退，彼何必不退。且上聖上賢皆修此業。

《西域記》說，西方即有無著、天親、師子覺等菩薩。

《高僧傳》說，此方亦有彌天釋道安、廬山慧遠、慧持等近親所見。

大唐即有三藏和尚、文備神泰法師等，皆修彼業，兼有上生靈感。

或有身在現相，或有將終現相，或有生後現相，人所共知，具如別傳。

西方勝處，人所樂生，此土穢方，誰能願住。但以經論明證，賢聖同修，背苦求樂，誠非上士。故，《無量壽經》下卷云：閻浮提一日一夜受持齋戒，勝無量壽國百年修善，以彼佛國無有惡故。

《維摩經》云：閻浮提修道一日一夜，過諸佛土百千大劫。

良以此世界中有十勝事，謂以布施攝貧窮等，厭苦心深，有苦可拔，西方淨土便無是事。處穢方而修淨行，實聖者之利他。居淨域而嚴淨因，非上士之弘濟。願於盲暗世界為作燈明，邪見眾中安立正道。但業行殘缺，願往西方，萬一不生，恐成自誤，故當己行，應修此業。

## B05 問答料簡

依上生下文。

優波離問云：此阿逸多具凡夫身，未斷諸漏，雖復出家，不修禪定，不斷煩惱等。明知此等，皆小乘經，大乘菩薩無是義故。

今依上生，初列跋陀波羅、文殊師利諸菩薩等，後陳化佛說陀羅尼，佛以一音聲說百億陀羅尼門。復言：身圓光中有〈首楞嚴三昧〉。又云：令五百億天子不退於阿耨多羅三藐三菩提等。明知是等，皆大乘經，小乘經中無是事故。

由是古德，或說此經為小乘，從阿含離出，說慈氏佛猶是凡夫身故。或說此經為大乘，說初列菩薩眾等，復非阿含中出。有云：依《大智度論》云：小乘經初，唯列聲聞，大乘經初，備兼菩薩。

今《上生經》初，既列聲聞菩薩，明知大乘經。《下生》雖略，亦大乘云。

大卷《成佛經》中，三會說法，皆有得證聲聞獨覺發於無上正等覺心，故知並大乘，其優婆離身處小位，所解局跡，以己所知，輒為此問，豈慈氏位次為彼所知，故定大乘。

如《金剛般若》，唯列聲聞，豈非大乘。

此《上生經》並彌勒受決，及《一切智光經》等皆晉代安陽侯譯。

《下生經》中大卷有如是我聞者，晉時竺法護所翻；小卷云大智舍利弗，無如是我聞者，是晉時羅什所譯。

古人解云：小卷者，阿含中出，大者，別坐所說。又解：翻者有異，其實一本。

今大師云：大者，有三分，無結集本。其小卷，無序分者是略，偈頌即二藏

中菩薩藏攝，非聲聞也。

①問彌勒、釋迦，誰初發意，今者成道，前後乃然？

②答《佛藏經》云：彌勒發心先四十劫，釋迦方發心。《佛本行經》第一卷云：昔有如來號曰善思，彌勒菩薩於彼佛所最初發心，在於我前四十餘劫，然後我發無上道心。有佛名示誨幢如來，我於彼國作轉輪王，名曰罕弓，初發道心。此中皆說後時發心。彌勒發心，因彌勒佛。釋迦發心，因釋迦佛，故彼非初，但以捨身苦行修業不同，所以彌勒成道終後。

③問如《賢劫經》明超劫事。《佛本行經》第三卷發心供養品云：昔，有佛出世號曰弗沙，彼佛在雜寶窟，我見彼佛，心生歡喜，合十指掌，翹於一足，七日七夜，讚歎彼佛。佛言：「是人過九十四劫，當得作佛見真理。」佛言：

「是人，過九十三劫當得作佛。」毘婆尸佛言：「是人，過九十一劫當得作佛。」《佛地論》亦說：釋迦超九劫，因事弗沙，翹足而歎，說超九劫，即百劫中修相好時。故，經多言「過去九十一劫有毘婆尸佛」，不說百劫。其九十一劫初有毘婆尸，故多作此說。《涅槃》等言：雪山菩薩為半頌捨身，超十二劫。《金光明經》：薩埵王子投身飼虎，超十一劫。摩訶仙人布髮掩泥，超於八劫。《菩薩地》言：菩薩修行有超水火及日月劫，無超阿僧祇。彼所言超，何時超也。

⑧雖無正文，理准應爾。翹足超九，百劫中超，餘說超者，阿僧祇內，不爾何位更得說超。

⑨《諸天勝所經》說：無邊一生菩薩何獨知足。

④答知欲樂之足，易可厭成故，菩薩處中勸化易故。上界欣掉既重，惡趣感行極深，既無佛現餘處，不如知足，三際諸佛，皆同住故。依《智度論往生品》說，兜率天眾，利根結薄，一生補處，常住其中。自下三天，結深心亂。自上二天，結厚根鈍，所以不住。不言他方來者，恐生疑謗句。化生故，不住人中，後生作佛。非應機宜，欣不深故。

④問十王果報，應為第四禪主，何故一生所繫居知足也，五地菩薩定處何天？

④答據因剋果，應為第四禪主，符下行化故捨而居知足，五地剋果，位處知足之天。修行不定處一方，何必要居兜率。一生住此，五地化遊，亦不爽也。但說菩薩應受十位，非諸菩薩皆定受之。捨位修行，隨利生故。

④問何故釋迦劫減百歲出世，彌勒劫增出世？

④釋迦，願於惡劫教化，行苦行等，並異彌勒。彌勒，願好時教化，所以不說超劫。又，釋迦眾生，遭苦發心，樂即退敗。彌勒眾生，樂即發心，苦即退敗。如聞俱胝耳樂妙樂具故，所以不同見。惡時出者，厭心深故。樂時出者，欣心勝故。

⑤何故釋迦刹帝利姓，彌勒菩薩婆羅門種？

⑥釋迦出自惡時，眾樂於富貴。彌勒出自好時，眾生樂於淨行。由斯二佛生姓不同。

⑦《長阿含經》云：毘婆尸佛人壽八萬歲時出世，尸棄佛人壽七萬歲時出，毘舍浮佛人壽六萬歲時出，拘留孫佛人壽四萬歲時出，拘那含牟尼佛人壽三萬歲時出，迦葉佛人壽二萬歲時出，釋迦一百歲時出，彌勒佛人壽八萬歲時出

世，豈前三佛同住劫耶？

⑧ 《五濁經》明賢劫前四佛同出第九住劫。或云住劫中，初五劫無佛。《阿含經》說佛出世時人壽長短，不說同劫，亦不相違。

## A02 釋經文

今此經中總有三分：

①說經因起分，②發請廣說分，③聞名喜行分。

神光炬燭，驚集有緣。舌相舒耀，總持方演。慈氏應時獨悟，請記佛前。釋迦為益當來，因斯記莚。故名說經因起分也。

婆離見惔記相，復念往昔佛言，所以發言申請，世尊為其廣說。故名發請廣說分。

陳事既周，時眾獲益。將冀流通後代，慶喜問其經名，聞法者積喜於胸懷，愛道者奉言以行學。故名聞名喜行分。

## B01 說經因起分

有二：①說經通所因，諸經通有故。②說經別所緣，是此經別有故。

### C01 說經通所因

又名證信序，委證此經，破疑生信故。

如是我聞：一時，佛在舍衛國祇樹給孤獨園。

今隨義增，各標別稱，不爾，信起，豈不通耶。若依古師，通序有六。

今依《佛地》，通序有五：

①為令生信，總顯已聞，言如是我聞。

②說者、聽者，共相會遇，時分無別，故名一時。

③法必有主，欲顯主尊，法必勝益，故須稱佛。

④說必依處，在舍衛國祇樹給孤獨園，化身所居，非報土也。

⑤教所被機，放光召集，根宜聞故。

## D01 如是我聞

阿難請其四事，佛遣致其通。由世尊為斷眾疑，慶喜又陳別序，俱承佛教，並利玄宗，觀教釋文，何容一准。

《佛地論》說：如是之言，依四義轉：

①依譬喻如。有說言：如是富貴如毘沙門。如是所傳所聞之法，如佛所說，定無有異，定為利樂方便之因，或當所說，如是文句，如我昔聞。

②依教誨如。有說言：汝當如是讀誦經典。此中如是，遠則佛之教誨，近即傳法者之教誨也。或告時眾：如是當聽我昔所聞。

③依問答如。謂有問言：汝當所說昔定聞耶？故此答言：如是我聞。

④依許可如。有說言：我當為汝，如是而思、如是而為、如是而說。謂結集時諸菩薩眾咸共請言：如汝所聞，當如是說。傳法菩薩便許可言：如是當說，如我所聞，或信可言，是事如是。謂如是法，我昔曾聞此事，如是齊此當說，定無有異。

由此四義，故經初置如是我聞。

真諦師云：微細律說：阿難昇坐集法藏時，身如諸佛具諸相好，下座之時，還復本形。勘集藏傳，亦作是說。

眾生有三疑：

①疑佛大悲，從涅槃起，更說妙法。

②疑更有佛從他方來，住此說法。

③疑彼阿難轉身成佛，為眾說法。

故經初言：如是我聞。非此三事，為令先信，除此三疑。

《注法花》云：如是者，感應之端。如以順機受名，是以無非立稱。眾生以無非為感，如來以順機為應。傳經者以名教，出於感應，故立言如是。

《注無量義經》云：聖人說法，但為顯如，唯如為是，故言如是。

瑤公云：以離五謗，名為如是。

①如是此經，離執有增益謗。

②如是此經，離執無損減謗。

③如是此經，離執亦有亦無相違謗。

④如是此經，離執非有非無愚癡謗。

⑤如是此經，離執非非有非非無戲論謗。

光宅云：如是將傳所聞前，題舉一部也。如是一部經義，我親從佛聞，即為我聞，作呼轍耳。

梁武帝云：如是如斯之義，是佛所說，故言如是。

長耳三藏云：如是有三：

①就佛。三世諸佛共說不異，名如。以同說故稱是。由斯可信，以同說故。

②就法。諸法實相，古今不異，故名為如。如如而說，故稱為是。既稱理言，不增不減，決定可信，故稱如是。

③就僧。以阿難言望佛本教，所傳不異，故名為如。求離過非，故稱為是。

又，如是者，信順之言。

《智度論》云：如是我聞，生信也。信受奉行，生智也。信為能入，智為能度。信為入法之初基，智為究竟之玄術。信則所言之理順，順則師資之道成。因信故，所說之法皆可順從。由順故，說聽二徒師資建立。

於此信中，略為十釋：

①依《仁王經》等。信者，趣聖道之初，因證諦理之鴻漸，故四十心以信為首，將入聖位，有信根、信力。有信根故，七覺因此而生。有信力故，四魔不能屈伏。故由斯經首，創令信生。

②依《大毘婆沙論》。信者，食法味之喜手。學佛法者，如大龍象，以信為手，以捨為身，以念為頸，以慧為頭，於兩肩擔集善法，象所飲啖，以鼻為手。故學法者，最初信生。

③學者大商元規法實，故初生信，獲彼聖財。《顯揚論》云：七聖財者，謂信、戒、聞、捨、慧、慚、愧。信即一焉。

④《瑜伽論》云：入一切法，欲為根本。起希望故，作意所生，數警覺故。觸所集起時對境故，受所引攝領在心故，定為增上心微寂故，慧為最勝擇善惡故，解脫為賢因息纏縛故，出離為後邊覺道滿故，信既為欲依故，最初令起。

⑤《成唯識論》云：信如水精珠，能清濁水，能治不信自性渾濁故。

宣尼云：兵食信三，信不可棄。春秋亦謂：苟有明信，澗溪沼沚之毛，蘋蘩蕒藻之菜，可薦於鬼神，可羞於公王也。

⑥《俱舍論》云：拔眾生出生死泥。正法佛手，即正宗也。信為眾生手，序分也。兩手相接，出淤泥故。

⑦諸論云：信者，能越惡道，離賤貧因。故入聖已，有不壞信，故初令起。

以下三解准經為釋。

⑧浮大溟海，假手以行舟。渡生死河，資信以發慧。

⑨見珍財，資手以採拾。聞法寶，藉信而方得。

⑩遊曠野而有手，持甲伏以捍群賊。出生死源而有信，發慧解而斷煩惱。

由斯經首，如是我聞，為令眾生起正信故。以上合有二十六釋。

言我聞者，傳法菩薩自指己身，言「如是法，親從佛聞。」故名我聞。我謂諸蘊世俗假者。然，我有三：

①妄所執我，謂外道等所橫計我。

②假施設我，謂大涅槃樂淨常我，除二乘倒強施設故。

③世流布我，謂世共傳天授等名。

今傳法者，隨順世間，自指稱我，不同前二，即是無我之大我也。

⑩諸佛說法，本除我執，何故不稱「無我聞」，乃言「我聞」？

⑪以四義故，但稱「我聞」。

①言說易故。若言無我，知此表誰。

②順世間。

③除無我怖。言「無我」者，為誰修學。

④有自他、染淨、因果事業等故，所以稱我。

⑫若爾者，何故不稱名字，但稱我耶？

⑬有三義：

①亦不乖俗。西域方言，汎皆稱我。宗雖顯真，說不乖俗。理雖顯妙，言不乖粗。欲顯真諦，不離俗故。

②我者，主宰自在之義。阿難多聞聞持，其聞積集，三慧齊修，文義並持。於三藏教，總持自在。若稱名字，雖順正理，無於諸法得自在義。由斯稱我，不道阿難。

③我者，親義。世間共言我見我聞，此將為親證。若言阿難聞，或非親聞，從他傳受。今顯親聞世尊，可說非是傳聞，破他疑網故，不稱字，但言我聞。

聞即耳根發識，聽受所說。今廢耳別，就我總稱，故名我聞。雖依大乘，根識心所境至和合，方名為聞。然，根五義勝識等故，根名聞。若但聞聲，可唯在耳，既緣名義，便在意中。故瑜伽言：聞謂比量，耳名聞者。

親聞於聲，與意為門，意方聞，故因聞所成，總名為聞。

若緣名義稱之，為聞既在於意，故合名聞廢別耳意，總稱我聞。

以耳為門，熏習在總，因聞所成，總名為聞，故名我聞。

慶喜于時雖亦見覺知佛所說，然三義但言我聞：欲證深理，要先聞故；此界以聲，為佛事故；希證菩提，要聞重故。

由斯經首，不說見覺知，唯說我聞，據實于時亦見佛說。

諸餘佛土，以光明等而為佛事，可言見等。

龍軍等言：佛唯有三法，謂大定智慧，久離戲論，曾不說法。由佛慈悲，本願緣力，眾生識上，文義相生。此文義相，雖親依自善根力起，而就強緣，名為佛說。由耳根力，乃自意變，故名我聞。

故無性云：聞者，識上直非直說，聚集顯現，以為體性。

若爾，云何菩薩能說彼增上生故作是說。譬如天等，增上力故，令於夢中得論呪等。故佛亦言，始從成道，終至涅槃，於其中間，不說一字，汝亦不聞。

親光等言：佛離分別，名無戲論。豈不說法，名無戲論。謂宜聞者，善根本願緣力，如來識上，文義相生。此文義相，是佛利他善根所起，故名我聞。

世親說言：謂餘相續，識差別故，令餘相續，差別識生，彼此互為增上緣。

故由此經說：我所說法，如手中葉；未所說法，如林中葉。此中二解，隨彼兩文，綺互解釋。

應知說此如是我聞，意避增減異分過失。謂如是法，我從佛聞，非他展轉。顯示聞者，有所堪能，諸有所聞，皆離增減異分過失；非如愚夫，無所堪能，

諸有所聞，或分別不能離增減異分。

結集法時，傳佛教者，依如來教，初說此言，為令眾生，恭敬信受。言如是法，我從佛聞，文義決定，無所增減。

是故聞者，應正聞已，如理思惟，當勤修學。

## D02 說教時分

### 一時

法王啟化，機器咸集，說聞事訖，總名一時。此就剎那相續無斷，說聽究竟假立名。論有二解：

①說道理時。說聽之徒，雖唯現在，五蘊諸行，剎那生滅，即此現法，有酬於前，引後之義，即以所酬，假名過去，所引之義，假名未來。並於現在法上

假立，即說聽者，五蘊諸法，剎那生滅，前後相生，事緒究竟，假立三世，總名一時。非一生滅，名為一時。

②說聽二徒，識心之上，變作三時相狀而起，實是現在。隨心分限，變作短長，事緒終訖，總名一時。如夢所見，謂有多生，覺位唯心，都無自體。聽者心變，三世亦爾。唯意所緣，不相應行蘊，法處法界所攝。

此中不定約剎那，亦不定約相續，亦不定約四時八時及十二時，亦不定約成道已謝竟年數時節，名為一時。但是聽者根熟，感佛為說。說者慈悲，應機為演說，聽事訖，總名一時。由能說者，得陀羅尼，說一字義，一切皆了。或能聽者，得淨耳意，聞一字義，一切皆解。或說者少時，聽者多時，或說者多時，聽者少時，故不定說一念、多劫之時節也。由於一會聽者之機有利有鈍。

如來神力，或延短念為長劫，或促多劫為短念，亦不定，故但約說聽究竟名一時，更無異義。

⑩何不別說四時、六時？

⑪晝夜時分，諸方不定。經擬諸方流通，所以不得別說。

⑫何不別說成道竟後若干時節？

⑬雖隨化相，亦可言之。然，凡聖所見佛身，報化所說淺深，成道近遠，各不同故。經擬凡聖同行，所以不得定說。

⑭處中有淨穢，隨機定說處，時中凡聖殊，何容不定說？

⑮說處標穢淨，穢可定知。說時短長，凡聖不可准一。會機宜有利、有鈍、長時、短時，如何准定，故處定說，而時總言。

### D03 說法教主

佛陀，梵音，此略云佛，有慧之主。唐言覺者，自覺覺他，覺行圓滿，故稱為佛。如次不同凡夫二乘菩薩三種，故以為名也。

《佛地論》云：具一切智、一切種智，能自開覺，亦能開覺一切有情，如睡夢覺，如蓮花開，故名為佛。

即古所言，無明惛睡，覺法相理中，覺空智、有智；理智、事智；真智、俗智，如所有智，盡所有智之差別也。准依梵本，標薄伽梵，即第十號。以此一名，總標眾德。由此外道皆稱本師名薄伽梵，此以翻譯之主意存省略，隨方生善，故稱佛名。

㊦此三身中，何身所攝？

⑧准所施化，即是化身。

文殊在中，亦通報佛。應化非真佛，亦非說法者。推功歸本，即是法佛。由機不同，一處見異，亦非定准。彌勒八相之尊說者，故成化佛。理通報法，義亦無違。今顯主尊，教隨最勝。初標勝主，令生喜故。

#### D04 說法處

在舍衛國祇樹給孤獨園

梵云，室羅筏悉底。言舍衛者，音訛略也。此中印土境，憍薩羅國之都城名，為別南憍薩羅故，以都城為國之稱。

真諦法師云：昔有兄弟二人，一名舍婆，二名婆提。故彼所翻金剛般若云：在舍婆提城，兄弟二人於此習仙，後而果遂，城因此號名舍婆提。

今新解云，應云豐德城。一具財物、二好欲境、三饒多聞、四豐解脫。國豐四德，故以名焉。

祇樹者，應云誓多林。祇樹者，訛也。誓多，云勝，此即太子名。太子生時，隣國怨至，戰而得勝，遂以為名。

給孤獨者，是蘇達多長者，此云善施。善施，仁而且叡，積而能散，拯濟貧乏，哀恤孤老。時人美其德，號給孤獨。是鉢刺犀刪特特王，舊云婆斯匿，此名勝軍，彼王之大臣也。佛在摩揭陀，未遊舍衛。給孤獨長者，為兒取婦，遂詣王舍城。時，有長者將延請佛，敬修供具。善施問其所由，長者具陳請佛。彼聞佛德，深心歡喜。佛在鷲山，相去數十餘里，遙放光照善施，尋光遙見世尊，悲感喜哽，如子見父，尋光詣佛。路逢天祠，善施禮拜，佛光遂滅。善施

慚愧，光明還燭。尋明至佛，請佛詣國，普化有緣，何獨此土。佛時許可，令舍利子先瞻度焉。佛言：出家之人當須寂靜，豐德人鬧，城中小隘，唯城南五六里餘，有太子誓多之園地。唯塽塹泉林繁鬱，壁方十里，可設伽藍。善施請買，太子不許，因戲言曰：布金滿地厚敷五寸，時即賣之。善施許諾，太子辭以戲言，因陳不與。善施請為斷理，時淨居天恐人遮之曲從，遂化為斷事者，斷與善施。善施得之，布金而取。時，少五百步，未滿十里，一庫金盡，使者來報。善施思惟，當取何金。太子疑其情悞，請悔地還金。善施具陳，心非悔買。太子知其情邈，自發勝心。人之所貴，莫過金寶，而彼當能傾庫買地，以造僧園，我何所乏，而無修建。請悔先地，長者不從。太子云：許地取金，未論林樹，地隨汝主，林屬我身，共助成功，俱陳供養。佛後遊此，告阿難曰：

園地善施所買，樹林誓多所施，二人同心，共崇功德，自今已後應謂此地為誓多林給孤獨園。化身在此彰報佛，而有淨土，劫盡火燒，而我土由來安穩。

結集不可具陳，二佛並顯，淨穢之土隨標一土。義准有三，事中有二，理亦有三，三身所居，各有異故，如理趣疏。

## D05 教所被機

爾時，世尊於初夜分，舉身放光，其光金色，繞祇陀園，周遍七匝，照須達舍，亦作金色。

於中有二：①放光集眾，②矚光眾集。

## E01 放光集眾

問何故此經放光集眾，餘經不爾？

⑧彌勒上生，因深果遠，若不警召有緣，有緣無由聞見。又，無明昏夜，覺照難生。不警群機，無由自悟。故，放光召集，不類餘經。

中有三：①放光，②雨花，③化佛說言。

### F01 放光

於中有六：①明化主世尊，②明時在初夜分，③明處舉身，④明神變放光，⑤明相狀金色，⑥明化境繞祇陀園照須達舍。

### G01 明化主世尊

《無垢稱經》：佛告阿難陀：以要言之，諸佛所有威儀進止受用施為，皆令所化有情調伏。是故，一切皆名佛事。

如《涅槃經》云：佛入涅槃二月十五日等，佛皆自說，各有所表。

故，此經文皆有表示，化主可知。

## G02 明時在初夜分

放光時。《涅槃》晨朝，《法花》白日，《般若》日中，此經初夜，各有所表。

釋迦牟尼出於五濁，是時有情煩惱已重，其未度者愚癡更多，所以初夜放。要初夜者，無始無明，極昏闇故。今佛初夜放大光明，表說深經，欲令於釋迦不得度眾生，令見彌勒，得聖智光，破重無明故。

## G03 明處舉身

舉者，遍也，遍身放光明。《涅槃》從其面門，《法花》從白毫出，《般若》次第遍身皆放。

## G04 明神變放光

今舉身以放光，顯佛慈悲，普弘濟故。顯修行者，並得度故。遍十方法界，悲智皆照故。要放光者，導迷徒故，破處黑闇諸眾生故，照愚盲者智眼開故。

## G05 明相狀金色

作金色者，《法花》白光，《涅槃》四色。此為金色，表可寶重故。濟末代眾生第一之珍寶。故繞祇陀園，警出家眾。

## G06 明化境

照須達舍者，警俗眾故，大施主故。欲顯聞經，驚集二眾，二眾聞經，於當來世彌勒佛所普得度故。

言七匝者，表令出家者，現在未來破七隨眠故，除身語七諸惡業故，持七支

戒故。當超七生，得七覺分故，法應如是。

## F02 明雨花

有金色光，猶如霞雲，遍舍衛國，處處皆雨金色蓮花。

有三：

①光形：光形如霞雲者，表佛法身周遍法界，化身隨物，猶如霞雲，蔭四生故，說法雨故，慈悲如雲。

②光處：遍舍衛者，釋迦牟尼受須達請，授彌勒記，此國眾生徧有緣故。舍衛豐德，表彌勒世出世財，皆具足故。

③雨金色蓮花：雨蓮花者，花有五德：

(1)能掩惡，喻滅眾罪；

(2)能生果，喻聞此經，見彌勒佛，獲證聖道；

(3)香氣遠聞，學經見佛，英聲遠振故；

(4)能出水，喻聞經等已，出生死海故；

(5)能開敷，喻今後佛敷妙義故。

### F03 化佛說言

有四：①化佛，②皆唱，③顯因，④明果。

### G01 化佛

其光明中，有無量百千諸大化佛。

喻彌勒上生，跡非真故，諸佛神變難思議故。

### G02 皆唱

皆唱是言：

喻百億釋迦，同與彌勒等授記故。

### G03 顯因

今於此中，有千菩薩。

今於此中有千菩薩者，顯未成佛，居賢劫位，當彌勒等現居因故。

### G04 明果

最初成佛，名拘樓孫。最後成佛，名曰樓至。

說是語已。

於此有緣，果當成佛故，令諸眾生各起希願，得親近故。如千佛因緣經具陳其事。

## E02 矚光眾集

於中有三：①四眾集，②二眾集，③八部集。

## F01 四眾集

於中有四：①苾芻眾，②苾芻尼眾，③近事男眾，④近事女眾。

## G01 苾芻眾

梵云苾芻，此具五義：①怖魔，②乞士，③淨持戒，④淨命，⑤破惡。

於中有四：①耆舊尊宿眾，②少欲杜多眾，③神通外化眾，④智慧內德眾。

## H01 耆舊尊宿眾

尊者阿若憍陳如，即從禪起，與其眷屬二百五十人俱。

梵云阿若，多解也。憍陳那，婆羅門姓中之一性也，憍陳如，訛也。

梵云薩縛遏刺他悉陀（唐言一切義成，舊云悉達多，訛略也），太子踰城之後，栖山隱谷，己身殉法。父王淨飯，乃命家族三人：①阿濕婆，此云馬勝，②拔提，③摩男拘利。舅氏二人：①憍陳那，②十力迦葉。王云：我子捨家修學，孤遊山野，故命汝曹，隨知所止。內則叔伯舅氏，外則君而且臣，凡厥動靜宜知進止。五人銜命，相望營衛，因即勤求，欲期出要。每相謂曰：夫修道者，苦證果耶？樂證果耶？二舅氏曰：要樂為道。三家族曰：勤苦為道。二三交諍，未有以明。太子思惟其理，為伏苦行外道，日食麻麥，以資支身。二舅氏曰：太子所行非真，失正道矣，道由樂證，今乃勤苦，非吾徒也。捨而遠遁，自思果證。太子六年苦行，未證菩提。欲驗苦行非真，受乳糜而證果。三家族曰：功垂成矣，今其退乎。六年苦行已，一旦損功，遂亦逃捨，相從求覓

舅氏二人。既相見已，往坐論曰：昔，見太子出王城就荒谷，去珍服被鹿皮，精勤苦心求無上法。今乃受牧羊女乳糜，敗道虧志，無能為也。二舅氏曰：君何見之晚乎，此猖獗人也，處深谷受尊位，不能靜志，遁迹山林，棄輪王之大寶，為鄙賤之庸人，何可念哉。言增慘切。太子浴尼連河，坐菩提樹，成等正覺，號天人師。思察應度唯鬱頭藍子者，證非想定，堪受妙法。空天報曰：彼命終來，經今七日。如來歎惜，斯何不遇。重更觀察：有阿藍迦藍，證無所有處定，可授至理。諸天又報曰：終已五日。如來再歎，愍其薄福。又更諦觀：誰應受教，唯施鹿林有五人者，堪先誘導。佛從覺樹趣鹿野園，威儀寂靜，神光晃耀，毫含玉彩，身瑩金色。安祥前進，導彼五人。五人遙見，互相謂曰：一切義成彼來者是歲月淹久，都無果證，心期屢返，故尋我徒。宜各默然，勿

起迎禮。如來漸近，威神所逼，五人忘制，各起禮迎，侍從如來。如來漸誘，示之妙理。為其示相，勸修作證，三轉法輪。佛問：解耶？時憍陳那最初答：解。地神唱告淨居，諸天亦言：憍陳那先解如是。乃至聲遍大千，因以為名名解。

憍陳那，今與其徒大德耆舊，見光晃耀雨花，宣唱從禪定起，趣世尊所。舊經或云：尊者了本際，或云解無智，皆得。阿若多義，不正得名，又不解憍陳那之姓故也。

## H02 少欲杜多眾

尊者摩訶迦葉，與其眷屬二百五十人俱。

摩訶，大也。迦葉波，飲光也。略故云迦葉。此婆羅門姓，飲光仙人種。

昔，有婆羅門獲證仙果，身皮金色，飲蔽日月之光。尊者是彼之種，以姓標名。又，迦葉身光，飲日月光，故以為名。

《付法藏傳》云：昔，過去九十一劫，毘婆尸佛入涅槃後，四部弟子起七寶塔，中有佛形像，佛面金色，少處缺壞。有一貧女，遊行乞丐，得一金珠。見像面壞，欲補像面。迦葉爾時作鍛金師，女即持往請令修造。金師聞福歡喜，為治用補像面。因共立願，願我二人常為夫婦，身真金色，恒受勝樂，常修梵行。從是以來，九十一劫，身真金色，生天人中，快樂無極，最後託生第七梵天。

時，摩竭國有婆羅門，名尼俱律陀，過去修福，聰明多智，巨富無量。金銀七寶、牛羊田宅、奴婢車乘、比瓶沙王，千倍為勝。瓶沙王有金犁千具，彼婆

羅門恐與王齊，畏招罪咎，其家但作九百九十九具。其家有麩，最下之者，其價猶直百千兩金。有六十簞金粟，一簞有三百四十斛。其家雖富，竟無兒息，於其舍邊有一樹神，夫婦常往祈請祭祠，求乞有子。多年無應，瞋忿語曰：今更七日，盡心奉事。若復無驗，必相燒剪。樹神愁怖，告四天王，四天王告帝釋。帝釋觀閻浮提無堪彼子，即詣梵王所，廣宣上事。梵王即以天眼遍觀，見一梵天臨當命終，即往勸之，勸其往生。梵天受教，即來託生。滿足十月，生一男兒，顏貌端正，身真金色，光明赫奕，照四十里。相師占曰：此兒宿福，必當出家。父母聞之，甚懷愁惱。夫婦議曰：當設何方斷絕其意？復自思惟：世所耽著，唯有美色。當為娉取端正好女用斷其情，至年十五，欲為娉妻。語父母言：我心清淨，不須婦也。父母不聽。兒知難免，便設權計，語父母言：

能為我得紫金色女，端正超世，我當取之。父母即召諸婆羅門遍行娉求，諸婆羅門鑄一金女，端正奇特，輿行村落，高聲唱言：若有女人，得見金神禮拜之者，後出嫁時，必得好婿，身真金色，端正殊妙。女聞悉出，唯有一女，軀體金色，端正殊好，即是往日施金珠女也，以昔勝緣，有此妙身，志樂清潔，獨不肯出。諸女強將共見金神，此女既到，金色光明映奪金神。婆羅門見，即為娉得。既到夫家，夫婦相對，各皆清潔，了無異意，共立要契，各住一房。父母知已，嚴塗一房，令其同舍，安置一床。迦葉語婦：我若眠息，汝當經行。汝若眠臥，我當經行。後次婦臥，垂手床前。毒蛇入室欲螫其手。迦葉見已，以衣裹手，舉著床上。婦便驚悟，而責之異。我立誓要不相近，今復何緣竊舉我手。迦葉答言：有蛇來入，恐傷汝手，妨廢修道，是故舉之，實無染意。即

指蛇示，婦意乃悟。夫婦節操，深厭世間，啟辭父母，求欲出家。父母見已，遂便聽許。於是夫婦俱共出家，來至佛前。佛為說法，即於此時得阿羅漢，三明六通，具八解脫。婦於後時，亦得阿羅漢。迦葉在世，常與如來對座說法。佛滅度後，所有法藏，悉付迦葉。迦葉後時，結集三藏竟，至鷄足山，全身不散。後，彌勒佛出世之時，從山而出，在大眾中作十八變，度人無量，然後滅身，未來成佛，號曰光明。如《法花》中，佛為授記。

### H03 神通外化眾

尊者大目犍連，與其眷屬二百五十人俱。

梵云摩訶沒特伽羅，此云大採菽氏，今訛略云大目犍連，此婆羅門種。上古有仙居山寂處，常採菽豆而食，因以為名，名大採菽氏。與舍利子小為親友，

舍利子以才明見貴，尊者以精鑒延譽，才智相比，動止必俱。結要終始契同，去就相與。厭俗苦求捨家，遂師珊闍耶焉。舍利子遇馬勝阿羅漢，聞法悟聖，還為尊者重述，聞而悟法，遂證初果，與其徒眾一百人俱，亦云二百五十人，俱到佛所。世尊遙見，指而告曰：彼來者，我弟子中神足第一。既至佛所，請入法中。世尊告曰：善來苾芻！淨修梵行，得離苦際。聞是語時，鬢髮白落，俗裳變緇。戒品清淨，威儀調順，經七日結漏盡，證阿羅漢果，得大神通。後佛在無熱惱池，人天咸集，唯舍利子不侍從會，佛命沒特伽羅往召來集。沒特伽羅承命而往，舍利子于時方補護法衣。沒特伽羅曰：佛在無熱惱池，命我召爾。舍利子曰：且止，待我補竟，與子同行。沒特伽羅曰：若不速行，欲運神力，舉爾石室至大會所。舍利子乃解帶置地，曰：若舉此帶而得動者，我身或

動。時，沒特伽羅運大神通，舉帶不動，地為之震。因以神足還詣佛所，見舍利子已在會坐。沒特伽羅俛而難曰：今乃以知神通之力，不如智慧之力矣。

今標其輩，云二百五十人俱。

#### H04 智慧內德眾

尊者舍利弗，與其眷屬二百五十人俱。

梵云設利弗但羅。設利，此云春鷲，亦云鷲鳥。弗但羅云子，今訛略故云舍利弗。母未懷子前，言詞訥鈍，每共弟摩訶俱絺羅論議，常不如弟。懷子以去，辯捷難酬，捩論恒勝。以母多辯，號曰春鷲，春鷲即今百舌鳥也。是彼所生，故復稱子，亦云鷲子也。尊者大婆羅門種，其父高才博識，深鑒精微，凡厥典籍，莫不究習。其妻感夢，具告夫曰：吾昨宵寐，夢感異人，身被鎧甲，

手執金剛，摧破諸山，退立一山之下，不知何所表。夫曰：夢甚善，汝當生男，達學貫世，摧諸論師，破其宗致，唯不如一人，為作弟子。果而有娠，母忽聰明，高論劇談，言無屈滯。尊者年始八歲，名擅四方，其性淳質，其心慈悲，朽壞結縛，成就智慧。與沒特伽羅子，少而為相友，深厭塵俗，未有所歸。於是，與沒特伽羅子，於珊闍耶外道所，正修習焉。乃相謂曰：斯非究竟之理，未能窮苦際也。各求明導，先嘗甘露，必同其味。時，大阿羅漢馬勝執持應器，入城乞食。舍利子見其威儀閑雅，即而問曰：汝師是誰？曰：釋種太子，厭世出家，成於正覺，是我師也。舍利子曰：所說何法，可得聞乎？曰：我初受教，未達深義。舍利子曰：願說所聞。馬勝乃隨宜演說。舍利弗聞已，即證初果，遂與其徒一百人，亦云二百五十人，往詣佛所。世尊遙見，指告眾

曰：我弟子中，智慧第一，彼來者是。至已頂禮，願從佛法。世尊告曰：善來苾芻！聞是語時，戒品具足。過半月後，復聞佛為長爪梵志說法，聞餘論而咸悟，遂證阿羅漢果。後阿難承佛告滅期，展轉相語，各懷悲感。舍利子深增戀仰，不忍見佛入般涅槃，遂請世尊，先入寂滅。世尊告曰：宜知是時。告謝門人，亦至本生里。侍者沙彌遍告城邑。未生怨王及彼國人，莫不風馳，皆悉雲會。舍利子廣為說法，聞已而去，於後夜分，正意繫心，入滅盡定，起已而寂滅焉。

## G02 苾芻尼眾

摩訶婆闍婆提比丘尼，與其眷屬千比丘尼俱。

梵云摩訶鉢刺闍鉢底，摩訶云大，鉢刺闍云生，鉢底云主，即大生主，舊云

婆闍婆提，此云大愛道，皆訛謬也。佛母摩訶摩耶夫人，此云大術，早為遷壽。生主是佛小母，故稱為姨母，為育養世尊，因證正覺。佛之所化，三乘聖人，名曰大生。或大者，眾義，一切眾生，皆為佛子。姨為佛母，大生賀賚，故言大生主。佛許出家，事如律說。

尼者，女聲。女有五德，名苾芻尼。言比丘尼者，音訛略也。

與其眷屬一千人，夜矚神光，俱來佛所。

### G03 近事男眾

須達長者，與三千優婆塞俱。

梵云鄔婆索迦，鄔婆近也，迦事也，索男聲也。於男聲中以呼之，即近事男，舊云伊補塞。優婆塞，云清信男，皆訛謬也。戒德俱圓，皆堪能親近承事

苾芻、大阿羅漢故。善施耆尊，稱為長者。靈光既照，亦來佛所。

#### G04 近事女眾

毘舍佉母，與二千優婆夷俱。

梵云毘舍佉，此云黑鹿。因兒得稱，名毘舍佉母。鄔婆斯迦，云近事女，斯女聲也。業行清潔，皆能親近苾芻尼眾、大阿羅漢尼故。鹿子因緣，如經廣說。

復有菩薩摩訶薩，名跋陀婆羅，與其眷屬十六菩薩俱。

#### F02 二眾

梵云菩提薩埵，此略云菩薩。菩提，覺義，智所求果。薩埵，有情義，悲所度生。依弘誓語，故名菩薩。又求三菩提之有情者，故名菩薩。或薩埵者，勇

健義。不憚處時求大菩提。有志有能，故名菩薩。又菩提即般若，薩埵謂方便，如是二法能利能樂一切有情，故名菩薩。

摩訶，大也。薩埵如前。今此菩薩位居十地，為簡於小，故言大薩埵。

梵云跋陀婆羅。跋陀者，賢義，婆羅者，護義，此云賢護菩薩。具大賢德，護念眾生，弘護佛法，故名賢護。與其徒十六菩薩俱。

文殊師利法王子，與其眷屬五百菩薩俱。

梵云曼殊室利，此云妙吉祥。文殊師利，音訛也。

《鶡掘摩羅經》言：是北方常喜世界歡喜藏摩尼寶積佛。諸有聞名、敬禮歸命，種種事業，菩薩皆能為作吉祥，神用無比，名妙吉祥。

法王子者，久應證覺，跡履因位。紹繼灌頂，佛之太子。由此，獨標法王子

稱。亦與其眷屬五百菩薩俱。

此二因緣，如經所說：前大智眾，此大悲眾；前今聖眾，此先聖眾；前十地眾，此紹位眾，故名二眾。

《法花論》云：跋陀波羅等十六人，威儀不定，具種種行，故此別標。

何故先列聲聞，後彰菩薩？聲聞等類，形像同佛，出家威儀，常親近佛，令諸菩薩，於聲聞眾生恭敬故、捨憍慢故。

### F03 八部眾

天、龍、夜叉、乾闥婆等，一切大眾，覩佛光明，皆來集會。

八部者：①天，②龍，③藥叉，舊云夜叉，④犍達縛，舊云乾闥婆，⑤阿素落，舊云阿修羅，⑥揭路荼，舊云迦樓羅，⑦緊捺路，舊云緊那羅，⑧莫呼路

伽，舊云摩睺羅伽。

藥叉者，此云勇健，或云暴惡。飛行空中，食啖生類，亦攝地行諸羅刹婆。

羅刹婆者，此云可畏。

犍達縛者，此云尋香行，諸作樂神中有此等輩。由此，西方呼諸散樂名犍達縛。不作生業，尋食香氣作樂乞求。

阿素洛者，此云非天。阿之言非，素洛云天，提婆之異名也。多行諂詐，無彼天行，故云非天。

揭路荼者，妙翅鳥也。翅羽嚴麗，雜色莊挾，特異眾禽，禽中最大，舊云金翅鳥，一切飛禽皆此所攝。

緊捺洛者，此云歌神。

莫呼洛伽，此云大腹田父，蝦蟇蟒蛇等類，皆此所攝。

此中且舉彼類之首，其中一一各有無量形容異類。如是等輩，一切大眾，覩佛光明，皆來集會。由佛智悲，廣為引化。有靈之類，皆悉奔波。希法雨以潤萌芽，冀智藥而除眾苦。如歸慈父，若趣醫王。但由平等，慈非恩沾，動植故也。

## C02 說經別所緣

又名發起序，顯發此經起之所由。

於中有五：①出舌放光，②有多化佛，③化佛說法，④釋迦自陳，⑤彌勒領悟。

## D01 出舌放光

爾時，世尊出廣長舌相，放千光明。

將說深經，先出舌者，明授彌勒記，濟度有緣，不妄語也。三十二相中，舌廣博相。凡時舌相，但覆面輪至髮等際。若作神通，或覆大千，或更無量。

《智度論》說：佛與阿難從舍衛國向婆羅門城。時，婆羅門城主信屬外道，聞佛欲來，即立制限：「若與佛食、共佛語者，當罰金錢滿五百文。」後佛來到，入城乞食，人皆閉門，佛與阿難空鉢而出。見一老婢，持破瓦器，盛臭糞，出門棄之。見佛相好，空鉢而來，心念欲施。佛知其意，申鉢從乞所棄糞。老婢淨心持表施佛，佛受施已，語阿難言：「此婢因施，十五劫中天上人間受福快樂，不墮惡道，後得男身，出家學道，成辟支佛。」當時佛邊有一婆羅門，聞佛此語，即語佛言：「汝是淨飯王之太子。何故為食，而作妄語？」

時，佛出舌，遍覆面輪，上至髮際，而語之言：「汝頗見『有如此舌人，而作妄語』？」婆羅門言：「若舌覆鼻，尚不妄語，何況覆面，上至髮際！」即生信心，而白佛言：「我今不解『少施報多』。」佛即告言：「汝頗曾見希有事不？」婆羅門言：「我曾行見尼拘陀樹其蔭遍覆五百乘車。」佛即問言：「樹種大小？」彼即答言：「大如芥子三分之一。」佛復語言：「誰當信汝？」婆羅門言：「實爾，世尊！我眼見之，非虛妄也。」佛即語言：「我見此女淨心施佛得大果報，亦如此樹因少報多。」時，婆羅門心開意解，向佛懺悔。佛為說法，得須陀洹果。即時，舉手大聲，唱言：「一切眾人！甘露門開，如何不出。」諸人聞已，皆送五百金錢與王，請佛供養，即破制限。王與群臣亦歸依佛。佛為說法，悉獲道果。故今出舌，顯授當記，眾生修行，願至彼所，定得

往生，表不妄語故。

《般若論》解：不妄語者。云於授記，曾不妄語。

放千光者，表小千界。

## D02 有多化佛

——光明，各有千色。——色中，有無量化佛。

各有化佛，破諸眾生愚癡暗故。

各有千色者，表中千界，各有千化佛。

——色中，有無量化佛者，表大千界，當來同有百億彌勒一時生故。

## D03 化佛說法

於中有二：①總，②別。

## E01 總

是諸化佛，異口同音，皆說《清淨諸大菩薩甚深不可思議諸陀羅尼法》。

身別故異口，語等故同音。

清淨諸大菩薩者，謂：

第十地因已圓滿，障亦微細，名為清淨。

或八地已上，一切煩惱皆不行故，名為清淨。

或初地已上，證性淨理，能伏諸惑，令總不行，名為清淨。

此三解中，初解圓得，次解任運相續而得，後解分證，一切無違。

甚深者，微妙義。不可思議，超分別心，言說道故。

梵云陀羅尼，此云總持。念慧二能總含眾德，以為體性，識達簡擇，明記不

妄，能以少略，含多廣故，名為總持。

法者，教也，說彼法故也。

## E02 別

所謂：阿難陀目佉陀羅尼、空慧陀羅尼、無礙性陀羅尼、大解脫無相陀羅尼。

此四別列者：①喜有，②解空，③於因無礙性，④於果大解脫。

解脫即無相，或第三謂四無礙解，外化辯才。第四謂諸福慧，內德解脫。或八地任運得初二，九地得第三，十地得第四。

或四總持：一法，二義，三能得菩薩無生法忍，四諸明呪。

如次配之，教法名有，所詮義名空。無生法忍，名無礙性，得此忍已，於一

切法無礙達故，諸呪名為大解脫。無相能解脫障縛，不可分別，名無相故。如幽贊中，略已顯示。

#### D04 釋迦自陳

爾時，世尊以一音聲，說百億陀羅尼門。

說此陀羅尼已。

欲明所記不虛故，今化佛同說。如說《法花》，能寂自陳，猶恐他惑，多寶塔涌，為證方明。今亦如是，非但我言，化佛同唱，欲令彌勒深悟解故。佛以法義二持，廣宣教理故，以一音演其百億，以略含廣，名總持也。

#### D05 彌勒領悟

於中有二：1.明領悟；2.明請記。

## E01 明領悟

爾時，會中有一菩薩，名曰彌勒，聞佛所說，應時即得百億陀羅尼門。

因行久圓，果今示證，微假資習，多有所成。釋迦一音纔宣，百億彌勒領悟，萬倍解生。由此，應時即得百萬億也。

## E02 明請記

即從座起，整衣服，叉手合掌，住立佛前。

坐中證悟，遂起整衣，申虔敬之儀，展請記之軌。

從座起者，表有所得，從生死起。

言衣服者，表四儀圓備，七支無缺，戒德滿故。

叉手合掌者，表心與境冥，理與神會，空智、有智，照冥真俗，智德圓也。

住立佛前者，表結使俱已，斷德圓備。或住而不動，表證三昧，心不動搖，定德成也。或示將有往生相故，所以起立。

此意總顯已出生死，三學久成，唯希為記，當生當覺。唯此軌儀，唯有身業，事不虛設，故各有表，威儀進止，皆法輪故。

## B02 發請廣說分

於中有二：①辯外果，②辯內果。

### C01 辯外果

復分為三：①波離啟請，②世尊廣答，③結勸生彼。

### D01 波離啟請

有二：①明請軌，②明陳請。

## E01 明請軌

爾時，優婆離亦從座起，頭面作禮。

一生補處，受記非輕，示相勸生，嚴因實重。若不因請而說，補處之相未尊。若無請而自談，欣當生之心不重。故，放光集眾，普召有緣。假請說經，令興重業。

梵言優婆離，此云近執。佛為太子，彼為佛大臣親近太子，執事之臣。古人云佛之家人，非也。今云優波離，訛也，如《無垢稱經》第三卷疏說。

亦從座起者，既見彌勒住立佛前，優波離承斯啟請，是故稱亦從座起者，表聞彌勒之事，當證菩提故從座起。

頭面作禮者，屈己尊首，禮佛卑足。一心頂戴，虔恭深故。憍慢久除，為顯

成佛尊貴因故，無見頂相之妙業故也。

## E02 明陳請

於中有二：①舉昔生今問，②顯今徵後問。

### F01 舉昔生今問

而白佛言：世尊！世尊往昔於毘尼中及諸經藏，說「阿逸多次當作佛」。

前言世尊，呼佛。又言世尊，談佛，談佛往昔說彌勒故。世出世尊，略言世尊，即是第十薄伽梵號。

梵云毘奈耶，此云調伏。調和控御身語等業，制伏滅除諸煩惱故，即是廣律本也。古云毘尼，或云毘泥，皆訛略也。近執明究律藏，頗亦諳經，受記多在律中，因斯起問。

阿逸多者，此云無能勝。彌勒，字也。名彌勒，字阿逸多。往昔佛在耆山說「次我後當成佛者」，名曰彌勒。時有菩薩，名曰慈氏，從座而起，白佛言：世尊！願我未來作彼彌勒。佛言：可爾。故，今舉昔而生今問。

## F02 顯今徵後問

於中其二：①舉今徵後生之處所，②舉今徵後生處淨穢。

## G01 舉今徵後生之處所

此阿逸多，具凡夫身，未斷諸漏。此人命終，當生何處？

波離下器，情局小乘，以己所知，輒揣尊極。小宗說「於菩薩三劫，猶是凡夫；樹下三十四心，方成聖者。」欲恚害覺，時亦未亡，故言凡夫。

未斷諸漏，漏有三種：如《法花》贊。

生何處者，三界何界？五趣何趣？四生何生？九有何有？觀因驗果，未遣心疑。惟願法王，指陳生域。

### G02 舉今徵後生處淨穢

其人今者，雖復出家，不修禪定，不斷煩惱。佛記此人成佛，無疑。此人命終，生何國土？

從緇落飾，形貌出家。常現威儀，不修禪定。受姨母之妙服，欲貪未遣。矚毫光而不識，尚有無知。佛記果圓，理深難測。命終生處，淨穢何方？但以菩薩不起滅定，而現威儀，將繼法王，遂取金疊，讓推先德，示問豪光。波離不知，乍謂無定，情粗覩相，真疑有惑。

禪定有九，煩惱有十，如餘處說。然，且成佛之先，必在覩史，一生補處，

大小共同。

波離挾己下心，輒量上位，示有不知，以發今請。

## D02 世尊廣答

有二：①勅聽許說，②依問具申。

### E01 勅聽許說

佛告優波離：諦聽！諦聽！善思念之！如來．應供．正遍知，今於此眾，說「彌勒菩薩摩訶薩阿耨多羅三藐三菩提記」。

諦者，審也，聽者，聆也。聽音察理，貴在審情。恐聽不明，重令諦聽。

極好作意，名為善思。憶持不忘，名為念之。

如來者，第一號也。《涅槃經》云：如過去諸佛所行妙行，三十七品、十一

空等，來至涅槃，故云如來。

應者，第二號也。應已永害煩惱賊故，應不復受分段生故，應受世間妙供養故。

正遍知者，第三號也。正知遍知，名正遍知；非邪知少知，知正滿故。具二種智，知空、有故。

上來三號，如次配之，斷德、恩德、智德。

阿耨等者，阿之言無，耨多羅云上，三言正，藐言等。又，三云正，菩提云覺，即是無上正等正覺。

諸法莫先，名無上覺，理事遍知，名正等覺，離妄照真，名正覺。

或智斷德，名無上覺，簡異生邪知，名正覺。簡二乘分知，名等覺。簡菩薩

缺知，復名正覺。下一覺字，貫通上文。

彌勒當來圓證此覺，獨得全名。記者，識也、驗也。佛自稱三德，今為汝等驗識分別，慈氏菩薩當來成佛之事。

## E02 依問具申

有二：①答生處，②答淨穢。

### F01 答生處

此人，從今十二年後，命終，必得往生兜率陀天上。

從今十二年後者，示授記，已永超生死十二緣，故生兜率天，而為補處。

### F02 答淨穢

有二：①正答淨穢，②結此所因歎處勝妙。

## G01 正答淨穢

夫，諸天福力，果出自然，況補處之宮，豈須他造。欲顯福異餘天，果從他作，諸天敬重，發願嚴因。又，諸天資具，凡業所生。知足宮園，必由勝行。外陳他作，內表修因。譬人王之內苑，似天帝之喜園，不說自然之報，唯陳他造之果。皆是菩薩未上生前，預知欲生，發願先作。

有三：①五百億天子造外眾寶宮，②一大神造法堂內院，③五大神於此二宮種種嚴飾。

## H01 五百億天子造外眾寶宮

有三：①諸天植因發願，②明天願果遂，③龍王守護。

## I01 諸天植因發願

有三：①明植因，②明發願，③明行願皆同。

### J01 明植因

有二：①明所因，②明植因。

### K01 明所因

爾時，兜率陀天上有五百億天子，一一天子，皆修甚深檀波羅蜜，為供養一生補處菩薩故，以天福力，造作宮殿。

修願行之所因者：①為修檀度，初業者之妙行故。②為供養菩薩故。

菩薩盡此一生，必定成佛，福田既大，故應植因。因者檀度，緣者願助，現傍資者，天之福力，由現天福，傍資因緣，二種力故，變成天宮因緣之果。既在良田，天之福資變成宮殿。

五百億者，由信、精進、念、定、慧五根，為勝因緣，內證法苑樂，外感五百億天子，為造宮殿。修餘萬行，資此五根，故以百億為稱，或是菩薩化預莊嚴。准報土中所有嚴飾，勝出世間善根所起故，此所說五根為因。

## K02 明植因

各各脫身旃檀摩尼寶冠，長跪合掌。

旃檀者，檀香也，色通赤白。

摩尼者，如意神珠，即身所著，如赤白檀香色。如意神珠，及天頂上所戴寶冠神珠。

施者，表當生當果，所求皆得，種智圓明，得如意故。

脫寶冠者，頂尊敬故。受記作佛，得最尊故。

諸天並脫，故言各各。

長跪者，雙膝著地，直身而住，敬相周故，表修定慧，恒無間故。

合掌者，虔恭之貌，表心境冥，證智合理故。

上明修行身業因，下明發願者語業因能起，二者意業因三輪備故。

## J02 明發願

有二：①起願因，②正發願。

## K01 起願因

發是願言：我今持是無價寶珠，及以天冠，為供養大心眾生故。

慈氏廣以智悲運蒼生，而居彼岸，情懷廣大。居因位而號眾生。

摩訶薩埵，云大有情。以義解之，名大心眾生。

## K02 正發願

此人來世，不久當成阿耨多羅三藐三菩提，我於彼佛莊嚴國界，得受記者，令我寶冠化成供具。

此人者，慈氏。當在人中，未生天趣，預興此願，故言「此人於未來世當成正覺，我於彼土佛成正覺時，可愛莊嚴殊勝國界得預彼會受記莝者，令我寶冠化成供具。」

供具者，四事什物供養之具。變寶冠而為供具，顯轉凡而修成聖位。此但說冠，略無寶珠，所願同故，或寶謂如意珠，冠謂天冠，合而論故。若不爾者，何故行因冠珠兩捨，及其發願獨有天冠，故應後釋，不違正理。

## J03 明行願皆同

如是，諸天子等，各各長跪。發弘誓願，亦復如是。

上雖總說諸天已訖，結集之家，恐生疑惑，施豈諸天，願唯一發。今顯行該一切願，亦普同三業修因，相皆等故。

## I02 天願果遂

有二：①明十重嚴飾，②明重顯前嚴。

### J01 明十重嚴飾

十重飾者：①宮，②垣，③寶，④光，⑤花，⑥樹，⑦色，⑧金光，⑨天女，⑩音樂。

宮

時，諸天子作是願已，是諸寶冠化作五百億寶宮。

既有十地菩薩圍繞，亦有凡夫十善往生，復是菩薩十力增上之所顯現。宮有十重，故下經云：菩薩福力、十善報應。

宮，謂法苑。

初地真智得空寂，捨創初得故。內修五根，所以外感宮等，皆言五百億。

### 垣寶二嚴

一一寶宮，有七重垣。一一垣，七寶所成。

二地持戒，生長善法，守護六根，感園圍繞。

三地證得聞思修慧，照了大乘教理行果。智光明故，感園寶成此。

各七者：二地持戒，七支備故。三地能照，三乘教理行果七支備故。又具忍辱七種觀故：①安受苦忍，②諦察法忍，餘五並是耐怨害。

忍，謂親屬想。准法想、無常想、有苦想、攝受想。如幽贊上卷說。

### 光花二嚴

一一寶，出五百億光明，一一光明中，有五百億蓮花。

四地修得菩提分法，慧焰增故，百行助成感百億光。

五地作四諦觀，出生死泥，智花敷故。內解五明，外感五百億花。

### 樹色二嚴

一一蓮花，化作五百億七寶行樹。一一樹葉，有五百億寶色。

六地作十二因緣觀，厭生死苦，樹感七寶樹故，思慧風動，樹觀緣起故。

七寶樹者，七十七智觀所引，故七地純作真無相觀，證法性色感妙色故。

### 金光天女二嚴

一一寶色，有五百億閻浮檀金光。一一閻浮檀金光中，出五百億諸天寶女。

八地相土，皆得自在故，能現起閻浮檀金光，此於諸金最為第一。近閻浮樹水下而有此金色蔽諸光，故偏舉此。

九地成就四無礙解，化利眾生，出生善根，感寶女故。

### 音樂嚴

一一寶女，住立樹下，執百億寶，無數瓔珞，出妙音樂。

女執諸寶及眾瓔珞，出妙音樂。

第十地中，得陀羅尼門、三摩地門，無礙神通，感寶瓔珞，貴莊嚴故。雲雨說法，感樂音故。

此上十嚴，皆由內具彼德，外招彼果。十善業道、十力智等，隨應釋相。

## J02 明重顯前嚴

有四：①廣第十，樂音說法。②廣第六，七寶行樹。③廣第四，破暗光明。  
④廣第二，垣牆高厚。

### 樂音說法

時，音樂中，演說不退轉地法輪之行。

不退有五：①未信者令信，信不退故。②未定者定，位不退故。③未得者得，證不退故。④未修者修，行不退故。⑤已斷者不生煩惱，斷不退故。

此乃三乘通不退地法輪之行。法輪能詮，行是所詮。正法輪者，唯所詮行，摧滅移轉行周圓，故行即法輪。今言法輪之行，故知教名法輪，說彼五位所修行也。以彼聽眾具三乘故。

法輪有五：①自性，②眷屬，③因，④境界，⑤果，如別章中說。

今言行者，即攝初三或攝一切。

### 七寶行樹

其樹生果，如頗梨色。一切眾色，入頗梨色中。

頗梨色者，謂紅赤色，此為根本。一切眾色，為此所含，皆入此色，顯所化生，至究竟位，皆歸一乘。

### 破暗光明

是諸光明，右旋婉轉，流出眾音，演說大慈大悲法。

右旋婉轉，表菩薩行該一切，不離智慧光明，及慧所引，拔苦與樂。

大慈大悲法者，大慈以無瞋不害為性，大悲以無瞋無癡為性。

此各有三：①有情緣，緣假有情。②法緣，不見有情，但唯有法。③無緣，法相亦無，唯有真理。

或有情緣，緣有情起。法緣，緣十二分教起。無緣，緣真如起，無所緣故。彌勒慈尊，導緣萬物故，演慈悲之法。

### 垣牆高厚

一一垣牆，高六十二由旬，厚十四由旬。

垣，謂垣牆。高六十二由旬者，顯生彼者，逾破六十二見故。厚十四由旬者，御摧十四不可記事故。

此四巖中，初二進行，皆歸一乘，發心證果，有差別故。次一破愚癡，濟有情類。後一永斷外道邪見。

## I03 龍王守護

有三：①明守護，②明雨寶樹，③吹樹說法。

### J01 明守護

五百億龍王，圍繞此垣。

法王教化，天神警衛，恐致外侵，龍王守護。

五百億者，顯內具五力，四魔不能屈伏。外有龍王，非人不能逼害。內持五戒，諸惡不侵。外感龍圍繞，橫災自滅矣。

### J02 明雨寶樹

一一龍王，雨五百億七寶行樹，莊嚴垣上。

因五力起七聖財故，外感龍王雨七寶樹嚴飾。

七聖財者，謂：信、戒、聞、捨、慧、慚、愧。

### J03 明吹樹說法

自然有風，吹動此樹。樹相振觸，演說苦、空、無常、無我、諸波羅蜜。

風喻大悲，任運所擊，真俗二智樹相振觸故，演如是等法：所謂一切有漏，逼迫自性，皆名為苦；所執法體都無，名空；有為起盡，遷流生滅，名無常；總無自體，一常實我，名無我故；由此能令諸修行者越到彼岸，名波羅蜜。

### H02 一大神造法堂內院。

慈氏內院，以堂為主，名造法堂。據實而言，具造內院，至下當悉。

於中有三：①發願，②所願果遂，③諸天覩勝，發願往生。

### I01 發願

有二：①明儀軌，②明發願。

### J01 明儀軌

爾時，此宮有一大神，名牢度跋提，即從座起，遍禮十方佛，發弘誓願：

普憑威力，遍禮十方，欲解廣大，發弘誓願。雖知凡聖同感內院，方成菩薩，力增多，由聖現。

一大神者，表無漏智，能起妙土。

《佛地論》云：勝出世間善根所起，如如意神珠，有神用故。亦是凡夫發菩提心，加行智感。

### J02 明發願

若我福德，應為彌勒菩薩造善法堂，令我額上自然出珠。

宣妙義舍，名善法堂，表親尊重。珠從額出，內院宮宇，如下自陳。

法堂尊勝，故標願首。

## I02 明所願果遂

有五：①明作宮，②明作園，③作座，④作柱，⑤天宮天女寶色皆同。

## J01 明作宮

有八：①明作宮殿，②作欄楯，③化生天子天女，④手生蓮花，⑤光明，⑥樂器，⑦起舞，⑧說法。

## K01 明作宮殿

有二：①出珠，②作宮。

出珠

既發願已，額上自然出五百億寶珠，瑠璃、頗梨、一切眾色，無不具足，如紫紺摩尼，表裏映徹。

瑠璃碧色，頗梨紅色。一切眾色皆具足者，額上之珠舉碧紅為首，自餘眾色皆悉皆足。紫謂紫色，紺謂深青，如紫青色。

如意神珠，表裏映徹。

作宮

此摩尼珠，迴施空中，化為四十九重微妙寶宮。

四十九重者，持戒堅牢，宮遂重密。

K02 作欄楯

一一欄楯，萬億梵摩尼寶所共合成。

### K03 化生天子天女

諸欄楯間，自然化生九億天子、五百億天女。

### K04 手生蓮花

——天子，手中化生無量億萬七寶蓮花。

### K05 光明

——蓮花上，有無量億光。

### K06 樂器

其光明中，具諸樂器。如是天樂，不鼓自鳴。

光有樂器，不須鼓擊，而自鳴也。

### K07 起舞

此聲出時，諸女自然執眾樂器，競起歌舞。

樂聲既動，女起舞歌。

### K08 說法

所詠歌音，演說十善、四弘誓願。諸天聞者，皆發無上道心。

不作生死之戲，皆演十善行、四弘之誓願。

四弘誓願者：①未離苦者，願令離苦。②未得樂者，願令得樂。③未發心斷惡修善者，願發心斷惡修善。④未成佛者，願早成佛。

亦云：知苦、斷集、證滅、修道。

諸天聞已，發大乘心，此由聖行八聖道支、八解脫業。凡持八戒：不殺、不盜、不淫、不妄語、不飲酒、不香鬘塗身、不歌舞作唱、不昇高廣大床、不非

時食，如其次第之所感得，聖凡眾行助正智等之所集成。以慧為先，安布間飾，故能致此。不爾，何緣有斯勝處。

## J02 明作園

有二：①列七事莊嚴，②結生彼得。

## K01 列七事莊嚴

有七：

時，諸園中，有八色瑠璃渠。

①八色渠者，青黃赤白紅紫碧綠。

一一渠，有五百億寶珠而用合成。

②寶珠合成。

——渠中，有八味水，八色具足。

③八味水，即前八色皆悉具足。八味水者，八功德水，可愛味故。

八功德水者：(1)清，(2)輕，(3)冷，(4)軟，(5)香，(6)美，(7)飲時不損喉，(8)飲已不傷腹。

其水上涌，繞梁棟間。於四門外化生四花。水出花中，如寶花流。

④水涌繞梁，門外生花，八色之水，從花而出，水色交映，如寶花流。

——花上，有二十四天女，身色微妙，如諸菩薩莊嚴身相。

⑤花生天女二十四者，持七支戒，防三世惡，別三心受。故，所感果有二十四。

手中自然化五百億寶器。

⑥手出寶器甘露滿中，表同法味故滿甘露。

一一器中，天諸甘露，自然盈滿。左肩荷佩無量瓔珞，右肩復負無量樂器。

如雲住空，從水而出，讚歎菩薩六波羅蜜。

⑦此諸天女，左佩瓔珞，右負樂器，從八色水而出，如瑞雲住空，讚歎菩薩諸波羅蜜。凡持七支戒身三語四，及修七聖財，兼行七覺分，除七隨眠之所招感。此等天女，或非實女，並佛菩薩所共化為莊嚴道場，或是實女宿持淨戒，精進無犯之所感現，不可凡心之所測度。

## K02 結生彼得

若有往生兜率天上，自然得此天女侍御。

## J03 作座

有十：

亦有七寶大師子座，高四由旬，閻浮檀金無量眾寶，以為莊嚴。

①座量高廣，清淨法界，內含四德，化身之座高四由旬。

②金寶莊嚴，三業妙行所嚴飾故。

言七寶者，三文不同。

《無量壽經》云：金、銀、瑠璃、頗梨、珊瑚、馬腦、車渠。

《恆水經》云：金、銀、珊瑚、真珠、車渠、明月珠、摩尼珠。

《佛地論》云：金、銀、吠瑠璃、頗胝迦、牟娑珞揚婆（當車渠也）、遏濕摩揚婆（當馬腦也）、赤真珠。

雖有帝青大青石藏杵藏，非常所重，故多不說。

三文不同，隨方愛樂差別，不可釋其不同所以。

座四角頭，生四蓮花。一一蓮花，百寶所成。一一寶，出百億光明。其光微妙，化為五百億眾寶雜花，莊嚴寶帳。

③座生四花。慈悲喜捨，內修四無量，外感四花故。

④百寶嚴飾。十善業道，自作教他，讚歎慶慰。少分多分全分、少時多時，盡形行故。一一有十，名為百行。內修百行，外感百寶所成，所以上下多說百數。

⑤寶放光明，智破暗故。

⑥雜花莊嚴，眾行助故。

時，十方面百千梵王，各各持一梵天妙寶，以為寶鈴，懸寶帳上。

時，小梵王，持天眾寶，以為羅網，彌覆帳上。

爾時，百千無數天子天女眷屬，各持寶花，以布座上。是諸蓮花，自然皆出五百億寶女，手執白拂，侍立帳內。

⑦內修四辯，外有大梵懸鈴，大人敬重故。

⑧內修總持，外有小梵張網。

⑨天子天女持花布座。

⑩寶女執拂侍立帳內，皆由凡除十惡修善戒，菩薩亦持十無盡戒之所招感。

#### J04 作柱

有四：

持宮四角，有四寶柱。

①於宮四角，各有一柱。

一一寶柱，有百千樓閣。梵摩尼珠，以為交絡。

②寶柱各有寶珠樓閣。梵摩尼者，謂淨摩尼，或大梵王如意珠也。此柱皆以梵如意珠而為交絡。

時，諸閣間，有百千天女，色妙無比，手執樂器。

③閣間天女，手執樂器。

其樂音中，演說苦、空、無常、無我、諸波羅蜜。

④樂音演法，內修四念住，心住不動，外感四柱種種莊嚴。

### J05 天宮天女寶色皆同

如是，天宮有百億萬無量寶色。一一諸女，亦同寶色。

欲顯內院種種莊嚴，欲令有情同入佛慧故。

### I03 諸天覩勝 發願往生

爾時，十方無量諸天，命終皆願往生兜率天宮。

彌勒生已，方皆發願，亦有未生而發願者。

### H03 五大神於內院外宮種種嚴飾。

於中有二：①標，②顯。

### I01 標

時，兜率天宮，有五大神：

由菩薩等內修五蘊，妙用無方。外感五神，威力無比。

五蘊者：①戒蘊，②定蘊，③慧蘊，緣有為慧，④解脫蘊，勝解數也，⑤解

脫知見蘊，緣無為慧。

## I02 顯

第一大神，名曰寶幢。身雨七寶，散宮牆內。一一寶珠，化成無量樂器，懸處空中，不鼓自鳴。有無量音，適眾生意。

內持戒蘊，外感大神，名曰寶幢，戒德尊高，如寶幢高顯故。內具七支，外雨七寶，由持戒故，各稱人心，感得樂音，適眾生意。

第二大神，名曰花德。身雨眾花，彌覆宮牆，化成花蓋。一一花蓋，百千幢旛，以為導引。

內修定蘊，外感大神，名曰花德，定水澄清出妙花故。起四無量雲，普覆四生，故身雨眾花，化成花蓋。無量眾德，助嚴禪定，感百千幢幡，以為導引。

第三大神，名曰香音。身毛孔中，雨出微妙海彼岸栴檀香。其香如雲，作百寶色，繞宮七匝。

內具慧蘊，說法利物，破無明臭，外感大神，名曰香音。

智慧可重，如海彼岸栴檀香。海彼岸栴檀香六銖，價直娑婆世界。

遶宮七匝者，除七漏故。七漏者，謂：見漏、念漏、受漏、思惟漏、根漏、惡漏、親近漏。

第四大神，名曰喜樂。雨如意珠。一一寶珠，自然住在幢旛之上，顯說無量歸佛、歸法、歸比丘僧，及說五戒、無量善法諸波羅蜜，饒益勸助菩提音者。

內嚴解脫蘊，外感大神，名曰喜樂。離邪解憂苦，得勝解喜樂。

心既決定，修行能成，故雨如意珠也。心常決定住於真如，外感神珠住在幢

幡之上。

既說三歸、又說五戒及諸善法。

饒益者，利樂義。勸者，讚勉義。助者，資益濟借義。音，謂音聲。者，謂行者。此意總顯神珠演說三歸五戒、利樂勸勉求大菩提教之行者。

第五大神，名曰正音聲。身諸毛孔，流出眾水。一一水上，有五百億花。一一花上，有二十五玉女。一一玉女，身諸毛孔，出一切音聲，勝天魔后所有音樂。

內修解脫智見蘊，外感大神，名曰正音聲。智順正理，如正音聲。

出眾水者，智水潑潤正覺芽故。

生五百億花者，嚴眾德故。

二十五玉女者，利益出生二十五有諸善根故。

此諸玉女出諸聲者，二十五有一切眾生皆歸念故，出世間聲美妙可愛故。

勝天魔后所有音樂，或五大神凡持五戒之所感得，亦是五通之所招集。神境通、他心、宿命、天眼、天耳，如次之所感現。

## G02 結此所因歎處勝妙

有二：①結因，②歎勝。

### H01 結因

佛告優波離：此名兜率陀天，十善報應勝妙福處。

十不善業得果有四：①異熟，②等流，③增上，④士用。

十善業道，能得五果，加離繫果。無漏得四，除異熟果。有漏有四，除離繫

果。二種相資，故得五果。

下明內身，即異熟果。又云：於一時中，成就五百億天子，得不退地，即離繫果。

此長壽等相似名等流果。此外果有二：①增上，②士用。如《瑜伽論》第五十九及《對法論》第八卷，廣說十惡業道所有果報。翻彼即是十善道果。此中總說十善道果，不別顯示。然諸善法，十善攝盡。業道據重，十善通輕。據此總攝一切善盡，隨義應知。

## H02 歎勝

若我住世，一小劫中，廣說一生補處菩薩報應、及十善果者，不能窮盡。今為汝等，略而解說。

一小劫者，日月歲數，劫也。三劫行因，果應無量，化佛示現，境界難思。下凡十善因，果亦大故。於一小劫，說亦難盡，即是聖凡二因之所招感，內外二果上下兩品所招集故。今為小器，略而解說，廣則無邊。

### D03 結勸生彼

有三：①示生彼人，②教生彼行，③結成正觀。

### E01 示生彼人

略有三種人：

佛告優波離：若有比丘，及一切大眾，不厭生死，樂生天者，

①菩薩行法，不厭生死，受生死苦，行利樂故，樂生天者。託勝所依，修妙行故，於一切生處受尊貴故。處劣自體，行不圓故，生天得見彌勒佛故。不同

二乘厭生死苦，恐天放逸，不樂生也。

愛敬無上菩提心者。

②樂修勝行，求大菩提，於彌勒所聞大法故。不樂大乘，希小果者，隨受生處，欣涅槃故。

欲為彌勒作弟子者，當作是觀。

③願於惡界為作善利。苦有情所，希行救濟，不願淨土，作餘佛弟子，彼無苦有情可行救濟，無苦可厭，欣心不深故。

又，釋迦末法，持戒犯戒、有戒無戒，釋迦皆囑彌勒度之。自揣解行，難生淨土。

可為彌勒作弟子者，於上所說天宮處所，應作是觀，其觀者何。

## E02 教生彼行

作是觀者，應持五戒、八齋、具足戒，身心精進，不求斷結，修十善法，一一思惟兜率陀天上上妙快樂。

此修五因：①持五戒。②持八戒。③持具足戒，即是出家五眾所受之戒，皆名具足戒。④身心精進，不求斷結。精謂精純，無惡雜故。進謂昇進，不懈退故。不求斷結者，非作精進六行斷結，六行斷結便生上二界故。⑤修十善法。

今此且論凡夫散心，五粗因行所感內外二院，增上果業未是具細分別解釋生彼業因，廣勸生中方具教示。雖修此因，要須一一思惟。彼天上妙快樂迴願生彼。前行非觀，觀為首故。思惟彼故，名之為觀。

## E03 結成正觀

作是觀者，名為正觀，若他觀者，名為邪觀。

去佛時遙，病重行缺。受佛付囑，欣當佛度，末代津梁，真為正觀。業淺識微，智量疎拙，欣生報土，越分所望，不稱病行，名為邪觀。

## C02 明內果

有三：①啟請，②廣答，③勸生於彼。

### D01 啟請

有三：①請儀，②歎勝，③正請。

爾時，優波離即從座起，整衣服，頭面作禮。

請儀

白佛言：世尊！兜率陀天上，乃有如是極妙樂事。

歎勝

今此大士，何時於閻浮提沒，生於彼天？

正請

有二問：①問此沒，②問生彼。

D02 廣答

有四：①答此沒，②答生彼天，③下生時節，④總結。

E01 答此沒

有七：①命終年月，②涅槃處所，③入滅形相，④終後生相，⑤舍利形相，⑥圓光神異，⑦天人供養。

F01 命終年月

佛告優波離：却後十二年，二月十五日。

却後十二年者，表聞授記，得超生死十二因緣。二月者，《涅槃經》第三十云：二月者，春陽之月，萬物生長，種植根栽，花果敷榮，江河盈滿，百獸孚乳。是時，眾生多生常想。為破此常，說一切法，悉是無常。唯說如來，常住無變。於六時中，孟冬枯悴，眾不愛樂；春陽和液，人所貪愛。為破眾生世間樂想故，演說常樂我淨亦爾。

言二月者，喻於如來二種法身：謂自性身，及智法身。

冬不樂者，喻於智者，不樂如來無常入於涅槃。二月樂者，喻於智者樂於如來常樂我淨。

種植者，喻聞法歡喜，發菩提心，種諸善根。江河盈滿者，喻於十方諸大菩

薩來詣我所，諮受如是大涅槃典。百獸孚乳者，喻我弟子生諸善根。

花喻七覺，果喻四果。以是義故，二月涅槃。

師子吼言：如來初生、出家、成道、轉妙法輪，皆以八日。何故涅槃獨十五日？善男子！如十五日，月無虧盈故。諸佛亦爾，入大涅槃，無有虧盈。

如十五日，月盛滿時，有十一勝事：

①能破暗，②令見道非道。③令見邪正。④能除鬱蒸，遂得清涼。⑤能破壞螢火高心。⑥息一切賊盜之想。⑦除眾生畏惡獸心。⑧能開優鉢羅花。⑨合赤蓮花。⑩發行人進路之心。⑪令諸眾生，樂受五欲，多獲快樂。

如來滿月，亦復如是：①破無明暗。②演說正道，破於邪道。③開示眾生生死邪險，得涅槃平正。④令人遠離貪瞋癡熱。⑤破壞外道光明。⑥破壞煩惱怨

賊。⑦除滅怖畏五蓋之心。⑧開敷眾生種善根心。⑨覆蓋眾生五欲之心。⑩發起眾生進修趣向大涅槃行。⑪令諸眾生樂修解脫。

故，十五日入涅槃，義理既同，故涅槃之時，與佛無異。

## F02 涅槃處所

於波羅奈國，劫波利村，波婆利大婆羅門家，本所生處。

於本國本村，父名波婆利，本生之處。

釋迦佛於迦維羅衛國生，於俱尸那國入滅。表此化緣已畢，餘方教化。《處胎經》第三說：我身今滅，不復更生於閻浮提，於十方面三十二姓諸佛剎中，遍施佛事。此緣盡故，彼不盡故。

慈氏本生處入滅者，此緣未盡，表於此滅，復於此生，行化利他故。

### F03 入滅形相

結跏趺坐，如入滅定。

結跏趺坐，如入滅定。釋迦北首，右脇枕手而卧入滅者。四威儀中，卧為極故，表釋迦佛，化緣盡故欲卧。必坐，顯彌勒佛利樂未盡，當得果時，事方終故。二相不同，表極未極有差別故。

如入滅定者，似入涅槃，實未圓寂，方上生故。

### F04 終後生相

身紫金色，光明艷赫，如百千日，上至兜率陀天。

身紫金色者，表利當生，最第一故。

如百千日者，能破眾生癡常想故。

## F05 舍利形相

其身舍利，如鑄金像，不動不搖。

舍利者，稻穀也。馱都者，佛體大小如稻穀量，故以為名。

釋迦如來碎身舍利，表分身十方，處處導利。

彌勒舍利全身，且居兜率，行一佛化故。

不動不搖者，表佛法身，本無生滅動搖作事故。

## F06 圓光神異

身圓光中，有首楞嚴三昧，般若波羅蜜，字義炳然。

梵云三摩地，此云等持。三昧者，訛略也。

大乘之中，妙定及慧，字之與義，二俱炳然。

炳然者，煥爛之異名也。此意即顯圓光之中，有定與慧，字義煥爛，溢目顯然，但矚其文而義顯，故義稱顯現。不爾，如何光能現義顯。身雖入滅，禪定智慧猶來明煥。

### F07 天人供養

時，諸天人尋即為起眾寶妙塔，供養舍利。

身雖入滅，法利猶存。

### E02 答生彼天

有六：①生處，②生相，③身量莊嚴，④異聖神變，⑤相好光明，⑥說法利益。

### F01 生處

時，兜率陀天，七寶臺內，摩尼殿上師子床座，忽然化生。

七寶臺者，七財飾故。

摩尼殿者，即法堂也。

師子座者，於彼臺中，法王位極，得無畏故。

忽然化生者，於四生中，得最勝故。自餘諸天，於父母膝上忽然化生。彌勒乃於師子床座化生。凡聖異故，欲顯菩薩離欲生故。

## F02 生相

於蓮花上，結跏趺坐，身如閻浮檀金色。

蓮花上者，於師子座上，更有蓮花。一切佛座，淨土等中，皆坐蓮花，表出生死之淤泥，透二乘之濁水故。

結跏趺坐者，如龍蟠屈，以左押右，降伏而坐。以右押左，吉祥而坐。既將說法，顯作吉祥。

身色如金，表可寶重。

### F03 身量莊嚴

長十六由旬，三十二相、八十種好，皆悉具足。

頂上肉髻，髮紺瑠璃色。釋迦毘楞伽摩尼，百千萬億甄叔迦寶，以嚴天冠。

長十六由旬者，德高無比，能越六道，超十地故。

相好之義，如下當說。壽量隨天，示同俗故。量越天眾，真德高故。

肉髻上髮，紺瑠璃之色。釋迦毘楞伽摩尼者，謂能種種現如意珠及甄叔迦寶以嚴天冠。甄叔迦寶，狀如延珪，寶似赤瑠璃。

## F04 異聖神變

其天寶冠，有百萬億色。一一色中，有無量百千化佛，諸化菩薩以為侍者。復有他方諸大菩薩，作十八變，隨意自在，住天冠中。

意顯心首，常共諸佛十方菩薩為伴侶故。

十八變者：①振動，②熾然，③流布，④示現，⑤轉變，⑥往來，⑦卷，⑧舒，⑨眾像入身，⑩同類往趣，⑪隱，⑫顯，⑬所作自在，⑭制他神變，⑮能施辯才，⑯能施憶念，⑰能施安樂，⑱放大光明。如《瑜伽論》第三十七說。

## F05 相好光明

彌勒眉間，有白毫相光，流出眾光，作百寶色。

三十二相，一一相中，有五百億寶色，一一好中，亦有五百億寶色，一一相

好，艷出八萬四千光明雲。

眉間毫相，第三十一相也。諸佛毫相，皆眉間者，極端嚴故。面為尊上，間表兩中，故顯佛恒時貴處中道。毫相若舒，便長無量。卷如秋月，圓皎鮮淨。白類珂雪，輝煥眾景。白為色本，表作情依，時有卷舒，顯隨緣現。

流出眾光者，彰演五乘，相中最勝，所以偏說，下聖無有，由此獨陳。

三十二相者，依《大般若》第三百八十一卷，佛言：善現！云何如來三十二相？

①世尊足下，有平滿相，妙善安住，猶如奩底。地雖高下，隨足所蹈，皆悉怛然，無不等觸。

②世尊足下，千輻輪紋，輞轂眾相，無不圓滿。

- ③世尊手指，皆悉柔軟，如靚羅綿，勝過一切。
- ④世尊手足，一一指間，猶如鵝王，咸有網鞞，金色絞絡，紋同綺畫。
- ⑤世尊手足，所有諸指，圓滿纖長，甚可愛樂。
- ⑥世尊足跟，廣長圓滿，與趺相稱，勝餘有情。
- ⑦世尊足趺，修高充滿，柔軟妙好，與跟相稱。
- ⑧世尊雙腠，漸次纖圓，如翳泥耶仙鹿王腠。
- ⑨世尊雙臂修直，漸次傭圓，如象王鼻，平立摩膝。
- ⑩世尊陰相，勢峯藏密，其猶龍馬，亦如象王。
- ⑪世尊毛孔，各一毛生，柔軟紺青，右旋宛轉。
- ⑫世尊髮毛，端皆上靡，右旋宛轉，柔軟紺青，嚴金色身，皆可愛樂。

- ⑬世尊身皮，細薄潤滑，塵垢水等，皆所不著。
- ⑭世尊身皮，皆真金色，光潔晃曜，如妙金臺，眾相莊嚴，眾所樂見。
- ⑮世尊兩足、二手掌中、頭及雙肩，七處充滿。
- ⑯世尊肩項，圓滿殊妙。
- ⑰世尊膊腋，悉皆充滿。
- ⑱世尊容儀，洪滿端直。
- ⑲世尊身相，修廣端嚴。
- ⑳世尊體相，縱廣量等，周匝圓滿，如諾瞿陀樹。
- ㉑世尊頷臆，并身上半，威容廣大，如師子王。
- ㉒世尊常光，面各一尋。

⑳世尊齒相，四十齊平，淨密根深，白逾珂雪。

㉑世尊四牙，鮮白鋒利。

㉒世尊常得味中上味，喉脈直故，能引身中諸支節脈。所有上味，風熱痰病不能為雜。由彼不雜，脈離沈浮，延縮損壞，擁曲等過，能正吞咽，津液流通。故身心適悅，常得上味。

㉓世尊舌相，薄淨廣長，能覆面輪，上至髮際。

㉔世尊梵音，詞韻和雅。隨眾多少，無不等聞。其聲洪震，猶如天鼓。發言婉約，如頻伽音。

㉕世尊眼睫，猶若牛王，紺青齊整，不相雜亂。

㉖世尊眼睛，紺青鮮白，紅環間飾，皎潔分明。

③⑩世尊面輪，其猶滿月，眉相皎淨，如天帝弓。

③⑪世尊眉間，有白毫相，右旋柔軟，如覩羅綿，鮮白光淨，逾珂雪等。

③⑫世尊頂上烏瑟膩沙，高顯周圓，猶如天蓋。

善現！是名三十二大丈夫相。

善現！云何如來應正等覺八十隨好？

①世尊指爪，狹長薄潤，光潔鮮白，如花赤銅。

②世尊手足，指圓纖長，傭直柔軟，節骨不現。

③世尊手足，齊等無差，於諸指間，悉皆充密。

④世尊手足，圓滿如意，軟淨光澤，色如蓮花。

⑤世尊筋脈，盤結堅固，深隱不現。

- ⑥世尊兩踝，俱隱不現。
- ⑦世尊行步，直進庠序，如龍象王。
- ⑧世尊行步，威容齊肅，如師子王。
- ⑨世尊行步，安平庠序，不過不減，猶如牛王。
- ⑩世尊行步，進止儀雅，猶如鵝王。
- ⑪世尊迴顧，必皆右旋，如龍象王，舉身隨轉。
- ⑫世尊支節，漸次傭圓，妙善安布。
- ⑬世尊骨節，交結無隙，猶如盤龍。
- ⑭世尊膝輪，妙善安布，堅固圓滿。
- ⑮世尊隱處，其紋妙好，威勢具足，圓滿清淨。

- ①⑥世尊身皮，潤滑柔軟，光悅鮮淨，塵垢不著。
- ①⑦世尊身容，敦肅無畏，常不怯弱。
- ①⑧世尊身皮，堅固稠密，善相屬著。
- ①⑨世尊身支，安定敦重，曾不掉動，圓滿無壞。
- ①⑩世尊身相，猶如仙王，周匝端嚴，光淨離翳。
- ①⑪世尊身有周匝圓光，於行等時，恒自照曜。
- ①⑫世尊腹形，方正無欠，柔軟不現，眾相莊嚴。
- ①⑬世尊臍深，右旋圓妙，清淨光澤。
- ①⑭世尊臍厚，不窳不凸，周匝妙好。
- ①⑮世尊皮膚，遠離疥癬，亦無黧點、疣贅等過。

- ②6世尊手掌，平滿柔軟，足下安平。
- ②7世尊手紋，深長明直，潤澤不斷。
- ②8世尊唇色，光潤丹暉，如頻婆果，上下相稱。
- ②9世尊面門，不長不短，不大不小，如量端嚴。
- ③0世尊舌相，柔軟廣長，如赤銅色。
- ③1世尊發聲，威震深遠，如象王吼，明朗清徹。
- ③2世尊音韻，美妙具足，如深谷響。
- ③3世尊鼻高，修而且直，其孔不現。
- ③4世尊諸齒，方整鮮白。
- ③5世尊諸牙，圓白光潔，漸次鋒利。

- ③⑥世尊眼睛，青白分明。
- ③⑦世尊眼相，修廣如青蓮花，甚可愛樂。
- ③⑧世尊眼睫，上下齊整，稠密不白。
- ③⑨世尊雙眉，長而不白，緻而細軟。
- ④⑩世尊雙眉，綺靡順次，紺瑠璃色。
- ④⑪世尊雙眉，高顯光潤，形如初月。
- ④⑫世尊耳厚，廣大修長，輪埵成就。
- ④⑬世尊兩耳，綺麗齊平，離眾過失。
- ④⑭世尊容儀，能令見者，無捨無染，皆生愛敬。
- ④⑮世尊額廣，圓滿平正，形相殊妙。

- ④6世尊身分，上下圓滿，如師子王，威嚴無對。
- ④7世尊首髮，修長紺青，稠密不白。
- ④8世尊首髮，香潔細軟潤澤，右旋婉轉。
- ④9世尊首髮，齊整無亂，亦不交雜。
- ⑤0世尊首髮，堅固不斷，永無墜落。
- ⑤1世尊首髮，光滑殊妙，塵垢不著。
- ⑤2世尊身分，堅固充實，逾那羅延。
- ⑤3世尊身體，長大端直。
- ⑤4世尊諸竅，清淨圓好。
- ⑤5世尊身支，勢力殊勝，無與等者。

- ⑤6 世尊身相，眾所樂觀，常無厭足。
- ⑤7 世尊面輪，修廣得所，皎潔光淨，如秋滿月。
- ⑤8 世尊顏貌，舒泰光顯，含笑先言，唯向不背。
- ⑤9 世尊面貌，光澤熙怡，遠離顰蹙、青赤等過。
- ⑥0 世尊身皮，清淨無垢，常無臭穢。
- ⑥1 世尊所有諸毛孔中，常出如意微妙之香。
- ⑥2 世尊面門，常出最上殊勝之香。
- ⑥3 世尊首相，周圓妙好，如末達那，亦如天蓋。
- ⑥4 世尊身毛，紺青光淨，如孔雀項，紅輝綺飾，色類赤銅。
- ⑥5 世尊法音，隨眾大小，不增不減，應理無差。

- ⑥世尊頂相，無能見者。
- ⑥世尊手足，指網分明，莊嚴妙好，如赤銅色。
- ⑥世尊行時，其足去地，如四指量，而現印紋。
- ⑥世尊自持，不待他衛，身無傾動，亦不透迤。
- ⑥世尊威德，遠震一切，惡心見喜，恐怖見安。
- ⑥世尊音聲，不高不下，隨眾生意，和悅與言。
- ⑥世尊能隨諸有情類，言音意樂，而為說法。
- ⑥世尊一音演說諸法，隨有情類，各令得解。
- ⑥世尊說法，咸依次第，必有因緣，言無不善。
- ⑥世尊等觀諸有情類，讚善毀惡，而無愛憎。

⑦⑥世尊所為，先觀後作，軌範具足，令識善淨。

⑦⑦世尊相好，一切有情，無能觀盡。

⑦⑧世尊頂骨，堅實圓滿。

⑦⑨世尊顏容，常少不老，好巡舊處。

⑦⑩世尊手足、及胸臆前，俱有吉祥、喜旋德相，紋同綺畫，色類朱丹。

善現！是名八十隨好。

善現！如來應正等覺成就如是諸相好故。身光任運，能照三千大千世界，無不遍滿。若作意時，即能普照無量無邊無數世界。然，為憐愍諸有情故，攝光常照面各一尋。若縱身光，即日月等所有光明皆常不現，諸有情類便不能知晝夜、半月、四時歲數，所作事業，皆不能成。佛聲任運，能遍三千大千世界。

若作意時，即能遍滿無量無邊無數世界。然，為利樂諸有情故，聲隨眾量，不減不增。

善現！如是功德勝利，我先在菩薩位修行般若波羅蜜多時，已能成辦，故今相好圓滿莊嚴。一切有情，見者歡喜，皆獲殊勝利益，安樂如是。

善現！菩薩摩訶薩行深般若波羅蜜多時，能以財法二種布施攝諸有情，是為甚奇希有之法。

三十二相，由行五修：①發心，②長時，③無間，④殷重，⑤無餘，之所感得。如《瑜伽論》第三十七說。

故，一一相，有五百億光明。八十隨形好中，由行八萬四千教行，逗八萬四千根病之所感，故得一一好，艷出八萬四千光明雲。

艷者，美義，非是焰義。雲者，出生蔭覆之義。八萬四千者，諸波羅蜜門也。

給從光曜，終至雙林，分布舍利、轉妙法輪等三百五十度，皆行六度，合二千一百，除貪瞋癡等分行。由此復成八千四百。又各能除四大六塵所生過失，故總合成八萬四千。

## F06 說法利益

有三：①陳所說，②明利益，③顯佛常業。

### G01 陳所說

與諸天子，各坐花座，晝夜六時，常說不退轉地法輪之行。

各坐花座者，表菩薩眾並出生死之淤泥故。

晝三夜三，名為六時。佛住六時，恒起六神變，說六度行，拔六趣生死，破六隨眠，超六塵故。

### G02 明利益

經一時中，成就五百億天子，令不退轉於阿耨多羅三藐三菩提。

成就五百億天子者，令生五根，具足五力，當圓五眼，超五道故。

### G03 顯佛常業

如是處兜率陀天，晝夜恒說此不退轉地法輪，度諸天子。

彼恒光明，都無暗夕。以起睡相，得其夜名。佛即不然，常度天子。

### E03 下生時節

閻浮提歲數五十六億萬歲，爾乃下生於閻浮提。如《彌勒下生經》說。

即住彼天之壽量也。

梵云瞻部，此樹名也。言閻浮提，訛也。此洲從樹名，四洲所由，如餘處說。

此間四百年，當彼天一日一夜。數彼三十日為月，十二月為年，彼天壽四千萬歲，慈氏窮天壽，而方下生，命不中天故。

此經云當閻浮提歲數五十六億萬歲者，依《瑜伽論》第四，及《立世經》、《毘婆沙》等計：此間四百年，為彼一日。此間四千萬歲，為彼十日。此間四萬歲，為彼百日。彼天一年，當此一十四萬四千年。彼天十年，當此間一百四十四萬年。彼天百年，當此間一百四十四億年。彼天千年，當此一千四百四十億年。彼天四千年，當此五千七百六十億歲。即與經文不同。今以理推，初以人

間四百年，為彼天一日夜。

復以一百而為一數計之，即相當矣。一當百故，人間四年，為彼天一日。人間四十年，為彼天十日。人間四百年，為彼百日。人間一千四百四十歲，為彼一年。人間一萬四千四百年，為彼天十年。人間一億四萬四千歲，為彼百年。人間十四億四萬歲，為彼千年。彼四千年，當人間五十七億六萬歲。

西方有四億數：①十萬為億，②百萬為億，③千萬為億，④萬萬為億。當人間五十七億六萬歲，以理而推，以千萬為億計之，即相當矣。

是故，於經，億字之上，應加七字，其前六字，應萬上安。只恐梵本，頗有參差，亦慮譯家自成謬算。不爾，便少一億五萬歲，理定應爾，智者應思。缺此歲數，四文不同。

《賢劫定意經》云：彌勒五億七十六萬歲當下作佛。其五億者，即五十億。前以十萬為一億，成五十億，此以百萬為一億，故成五億。七十萬者，即七億也。十萬為一億，故六萬數同，更不勞釋。

唯此一經，增減雖殊，與論算同，自餘皆別。

雙卷《泥洹經》云：一億四千歲，全不相當。

此經，及《一切智光明仙人慈心三昧經》云：五十六億萬歲，如前以并。

《菩薩處胎經》及《賢愚經》云：五十六億七千萬歲，其六字應云七，七字應云六。其千萬者，以百萬為一億算之，六千萬者六十億也，義不相違。

如是推尋，雖乖古疏，尋文究理，亦應無謬。

菩薩在天壽量，曾無中天，生在人間。大卷《成佛經》說：壽六萬歲，天盡

其年。人間長壽者，時宜現故不同釋迦，天盡其年，人間早滅，恐眾生厭故，化緣畢故。

《處胎經》說：彌勒，人間壽八萬四千歲。若依彼說，不須和會。

如《下生經》陳下生事，天利既畢，人機復熟，故乃下生。

#### E04 總結

佛告優波離：是名彌勒菩薩，於閻浮提沒，生兜率陀天因緣。

因緣者，相狀所由，為利益故，終沒上生。皆有所由，名因緣故。

#### D03 勸生於彼

有三：①勸生彼行，②眾發希願，③結成正觀。

#### E01 勸生彼行

有五：①弟子修六事法，皆願往生。②八部聞名，敬喜往生。③二眾犯戒，悔淨往生。④歸依不退，當得度脫。⑤四部弟子願往生者，修十善行，念名恭敬等，滅罪多少。

雖有五段，束之為三：①明三品往生，②明作歸依，總勸生彼，證得善利。③示歸生者，滅罪多少。

### F01 明三品往生

有三：①明上品行生，②明中品行生，③明下品行生。

### G01 上品行生

有六：①示其六法，②教其迴願，③明正往生，④諸天讚勸，⑤生彼利益，⑥總結成上。

## H01 示六事法

佛滅度後，我諸弟子，若有精勤修諸功德、威儀不缺、掃塔塗地、以眾名香妙花供養、行眾三昧深入正受、讀誦經典。

①精勤修福，悲敬田中所作業等。

②威儀不缺，堅守諸戒，自住軌則等。

③掃塔塗地，修飾道場，整理制多等。

④香花供養，四事什物，隨給濟等。

⑤凡夫行眾三昧，聞思等定，聖人深入正受，隨所得禪，或凡三昧，非六行定。六行定者，必上生故，雖住聞思，亦名三昧。

⑥讀誦經典，演說修習，十法行等。

且舉六業，偏勝易行，以為上首。有此六事，其中一一，具攝眾業。若具修六，或能修五，上上品生。若修三四，上中品生。若修一二，上下品生。

## H02 教其迴願

有三：①歎業勝，②正稱念，③勸迴願。

### I01 歎業勝

如是等人，應當至心，雖不斷結，如得六通。

雖諸凡夫，不斷結使，異於聖者。若修六事，神用廣大，必定往生，如得六通聖者無異。

### I02 明稱念

應當繫念，念佛形像，稱彌勒名。

雖復修行，仍須正念，心想形容，口恒稱念。

### I03 明迴願

如是等輩，若一念頃，受八戒齋，修諸淨業，發弘誓願。

如上所說行六事輩，極少但能於一念頃，至心不犯，持八戒齋，隨修淨業，發願資助，迴向定生。

言一念者，非餘時犯，唯一念持。初唯發願，一念持故，何況多時。

### H03 明正往生

命終之後，譬如壯士屈申臂頃，即得往生兜率陀天。

生時節。譬如壯士屈申臂頃，顯業決定，生便速疾。

於蓮花上，結跏趺坐。

生處所。蓮花之上，結跏趺坐，定出生死，除煩惱故。

既生彼天，修於梵行，故於蓮花上，結跏趺坐。

#### H04 諸天讚勸

有三：①散花，②讚歎，③勸歸依。

#### I01 作樂散花

百千天子，作天妓樂，持天曼陀羅花、摩訶曼陀羅花，以散其上。

摩訶曼陀羅花者，此云大適意花。

#### I02 讚歎

讚言：善哉！善哉！善男子！汝於閻浮提，廣修福業，來生此處。

歎美深極，重言善哉，由習大因，今成勝果。

### I03 勸歸依

此處，名兜率陀天。今此天主，名曰彌勒，汝當歸依。

處名知足，由是不耽生死，主號慈尊，故能慈矜苦厄。

### H05 生彼利益

有二：①滅罪，②獲得。

### I01 滅罪

應聲即禮。禮已，諦觀眉間白毫相光，即得超越九十億劫生死之罪。

無間罪劫，一增一減，餘處罪劫，年數為之，末劫凡夫，行多庸鄙，能超惡境，祈彼淨方，夙運不殫，生為上品，況乎靈境，矚在毫光，心專諦觀，豈不超生死者也。

## I02 獲得

是時，菩薩隨其宿緣，為說妙法，令其堅固不退轉於無上道心。

隨說宿緣，令憶前業，識因知果，自成不退。昔不退者，更為堅固。隨其位次，成上發心。

## H06 總結成上

有四：①得上生，②隨下，③值賢劫佛，④值星宿劫佛。

## I01 得上生

如是等眾生，若淨諸業、行六事法，必定無疑，當得生於兜率天上，值遇彌勒。

三業俱淨，六事齊修，後生彼天，此事何惑。隨修六法，少淨三業，心祈不

二，後定上生。

I02 隨下

亦隨彌勒，下閻浮提，第一聞法。

父子之道，尚感天然，虎嘯風生，此事何惑。六事滿，三業淨圓，上品生者，隨初會而聞法。

I03 值賢劫佛

於未來世，值遇賢劫一切諸佛。

善業純備，正見恆生，既具智福之資糧，逢賢劫千佛。

I04 值星宿劫佛

於星宿劫，亦得值遇諸佛世尊，於諸佛前，受菩提記。

小乘中說，初劫逢七萬五千佛，第二劫逢七萬六千佛，第三劫逢七萬七千佛。

依《涅槃經》第六卷行四依中，初依在地前逢五恒河沙佛，第二依在初地至六地逢六恒河沙佛，第三依在七八九地逢七恒河沙佛，第四依在十地逢八恒河沙佛。

初地菩薩得值百億佛，二地逢千億佛，乃至十地逢無量無邊。

故生彼者，因見彌勒，得逢星宿劫千佛，此何疑也。

受菩提記者，此句通上。賢劫諸佛，亦為受記。受記有四，如菩薩地說。

## G02 中品行生

聞名敬喜，發願往生。

於中有二：①明敬喜，發願往生。②明不願生，聞名亦利益。

### H01 明敬喜，發願往生

佛告優波離：佛滅度後，比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩睺羅伽等，是諸大眾，若有得聞彌勒菩薩摩訶薩名者，聞已歡喜，恭敬禮拜。此人命終，如彈指頃，即得往生，如前無異。

四眾八部，先不犯戒，亦不造惡，罪輕微者，聞名心喜，語發恭敬，身禮拜者，由因勝劣，當果雖殊。天讚罪除，不退值佛，與前無異。

具三業者，中上品生。唯具二業，中中品生。若唯一業，中下品生。

### H02 明不願生，聞名亦利益

有二：①無惡，②有善。

## I01 無惡

但得聞是彌勒名者。命終，亦不墮黑闇處、邊地、邪見、諸惡律儀。

①不墮暗處。若處黑暗，名暗處，即諸地獄及二界中間。若黑果處，名黑暗處，即三惡趣及二界中間，無佛法處也。

②不墮邊地。不墮之言，貫下三句。若處邊，名邊，即諸邊境，匱賢良處，若行邊，名邊，即攝處邊及蔑戾車達絮等處，前不墮三塗，此不墮八難，

③不墮邪見，若別邪見，唯斷善根。類若不正，名邪，五惡見皆是。

④不墮諸惡律儀。惡者，不善也。律者，法也。儀者，則也，式也。即不律儀。

《對法》第八：不律儀者有十五，所謂：屠羊、養鷄、養豬、捕魚、捕鳥、獵鹿、買兔、劫盜、魁膾、害牛、縛象、立壇、呪龍、守獄、讒構好為損等。

《涅槃經》中說有十六：牛、羊、鷄、豬，為利故養肥，肥已轉賣，即以為四；為利故買，買已屠殺，復以為四，并前為八。捕魚、捕鳥、獵師、劫盜、魁膾、兩舌、獄卒、呪龍，復以為八，合前十六。

《瑜伽》第九，說有十二：加對法一，少對法三。

《雜心》，說十二，謂：屠羊、養豬、養鷄、捕鳥、捕魚、獵師、作賊、魁膾、守獄、呪龍、屠犬、伺獵，總有十二。

文不同者。《涅槃》獵師，即攝獵鹿、買兔、縛象三種。《對法》舉多分，且說三種。《涅槃》意通捉雉之屬，《對法》樂損。《涅槃》中無，《對法》

寬故。《涅槃》初八開差別故，即《對法》四俱彼生。故《對法》讒構即是兩舌，名異義同。故，《雜心》小宗俱說，重者名非律儀，餘者輕故。

此惡律儀，亦攝一切犯戒惡行。

其墮邪見及惡律儀，有佛無佛、中方邊方，皆具有之。

若聞彌勒名，皆定不墮。三業歸依，深心歡喜，四等宿願，威力加故。

## I02 有善

恒生正見，眷屬成就，不謗三寶。

①恒生正見，翻前邪見。

②眷屬成就，翻前不作諸惡律儀。惡律儀者，惡眷屬故。

③不謗三寶，翻前不墮黑闇處、不生邊地，恒逢三寶，生信向故。

不但中品無四惡有三善，上下品生隨應亦有。欲明聞名者，改八部之異形，受四生之勝體。偏於中品而獨明之。

### G03 下品行生

二眾犯戒，悔淨往生。

有三：①悔歸罪滅，修行往生。②見得不退。③未來值佛。

### H01 悔歸罪滅，修行往生

有三：①罪滅，②修行，③往生。

### I01 罪滅

佛告優波離：若善男子善女人，犯諸禁戒，造眾惡業。聞是菩薩大悲名字，五體投地，誠心懺悔。是諸惡業，速得清淨。

有二：①先受戒禁，而後犯之。②先不受戒，造眾惡業。

聞名歸依，兩手二足，及以頭首，五體投地，至誠懺悔，罪速清淨。

## I02 修行

未來世中，諸眾生等，聞是菩薩大悲名稱，造立形像，香花、衣服、繒蓋、幢幡，禮拜、繫念。

設不作罪，懺悔願生，但修十行，定得往生。

①聞名稱念，②造像，③香供養，④花供養，⑤衣服供養，⑥繒蓋供養，⑦幢供養，⑧幡供養，⑨身恒禮拜，⑩心口繫念。

## I03 往生

此人欲命終時，彌勒菩薩放眉間白毫大人相光，與諸天子，雨曼陀羅花，來

迎此人。此人須臾，即得往生。

犯戒造惡，悔歸清淨，聞名修行，命欲終時，菩薩放白毫之妙光，滅其罪暗。雨綺花之麗色，長其道種。佛天來迎，表慈深故。須臾往生，顯業勝故。

有三：

- ①懺悔、造像、供養、禮拜、及繫念者，下品上生；
- ②懺悔、造像、供養、禮拜、不恒繫念者，下品中生；
- ③懺悔、造像、供養，不恒禮拜，不常念者，下品下生。

雖歸懺悔，罪得消滅，不造形像供養禮拜等，或但造形像，或但供養，或但禮拜，或但繫念，或一稱名，下下品生。設不生彼，三會之中，亦得度脫。

H02 見得不退

值遇彌勒，頭面禮敬。未舉頭頃，便得聞法。即於無上道，得不退轉。

善根久熟，見便禮敬。慈悲自起，疾得聞法，除不信心，速得不退。

### H03 未來值佛

於未來世，得值恒河沙等諸佛如來。

上來三類明九品生，並內眾中親得見佛、速聞法也。若生外院，除第九品，任運後時，還成不退。佛號慈尊，善自長故。

### F02 明有歸依不退，當得度脫

佛告優波離：汝今諦聽！是彌勒菩薩，於未來世，當為眾生，作大歸依處。

①明作歸依處，我即滅度，真報之佛，未逢末法，弟子皆囑慈尊令度，若不見者，便失大利，名作歸依。

若有歸依彌勒菩薩者。當知：是人，於無上道，得不退轉。

②歸依者，得不退。

彌勒菩薩成多陀阿伽度。阿羅訶。三藐三佛陀時，如此行人，見佛光明，即得授記。

③彌勒成佛，見光受記，其得聖者，慧矚智光。其凡夫者，眼見金色。

多陀阿伽度，如來也。阿羅訶，應也。三藐三佛陀，正遍知也。

F03 示歸生者，滅罪多少

願往生者，修十善行，念名恭敬等，滅罪多少。

有二：①明樂生，業滿得生，②明不樂生，業亦未滿。

G01 明樂生，業滿得生

有四：①令念，②勸行，③教願，④滅罪。

### H01 令念

佛告優波離：佛滅度後，四部弟子、天、龍、鬼神，若有欲生兜率陀天者，當作是觀，繫念思惟。

### H02 勸行

念兜率陀天，持佛禁戒，一日至七日，思念十善，行十善道。

但於持戒，不論餘業。舉其極少，一日至七日，亦得往生。何況多時，多生修行。以一切善，十善攝盡，故思念之。行據重者，名十善道。

### H03 教願

以此功德，迴向願生彌勒前者，當作是觀。

有行無願，而行必孤，未必得生慈氏所故。有願無行，而願必虛，前既無因，果不生故。所以教願與行相扶。

## H04 滅罪

有三：①逢緣駐想，②聞名起敬，③禮拜投誠。

### I01 逢緣駐想

作是觀者，若見一天人、見一蓮花。若一念頃，稱彌勒名，此人除却千二百劫生死之罪。

有二：有情緣、諸法緣。

見一天人者，隨遇一有情緣，即念彌勒。有苦念拔，無樂念與。惡者念除，善者念攝。勝者念求，劣者念厭。善友念崇，惡友念拒。

見一蓮花者，隨遇一法緣，即念彌勒。好法思供養，惡法思不遇。染法欣斷，淨法欣修。此中且舉一有情及一法緣，即念彌勒，此意總顯作上生業。

二品修行者，逢緣思念，一切時念不暫休廢。若一念頃，滅千二百劫生死之罪。慈氏宿願，念者心專，故致於此。阿彌陀佛滅八十劫罪滅，彌勒者願力不同。慈悲深淺，樂苦土殊。欣心輕重，有差別故。如前章中說。

## I02 聞名起敬

但聞彌勒名，合掌恭敬，此人除却五十劫生死之罪。

前明修行，若逢一緣，一念頃念，滅千二百劫罪。此但聞名，合掌恭敬，除五十劫罪。但發身業，首不至地，歸心輕故。

## I03 禮拜投誠

若有敬禮彌勒者，除却百億劫生死之罪。

以首至地，晝夜相續，除百億劫罪。身心等歸，並皆重故。此為最重。第一見毫光，第二一念頃念，第三聞名合掌，第四敬禮投誠。此四滅罪不同者，輕重異故。

①何故見身毫相，不如遙念？

②見佛身相，滅罪實多。良以遙念，行而難生，見歸崇而易起。行化之法，先勸作難修，後勸作易行。

又，人間苦重，欣意殊深。天上樂多，厭心誠淺。

又，遙念者，多念頃，時長故、意念故。

見光者，暫時間，時短故，眼見故。故，遙念者滅罪多，見毫光者滅罪少。

①問 聞名歸念，滅罪多少，經有明文。造像供養，功德多少？

②答 功德更多，作事相續，念亦大故。

此中且舉少禮少念，一暫歸聞。若數數聽聞，頻頻敬禮，朝朝供養，功德更多。

前三品修，但明得生之福，未論罪滅之相。第二段中明作歸依不退利益。今第三段中方明滅罪。即是總說作大歸依，令眾欣生，歸崇滅罪也。

### G02 明不樂生，業力未滿者

設不生天，未來世中，龍花菩提樹下，亦得值遇，發無上心。

龍花三會，亦發道心。其前樂生三品業滿，龍花三會並皆得道。此唯發心，故成差別。

《菩薩處胎經》第二卷，說偈云：汝生快樂國，不如我國苦。汝說法甚易，我說法甚難。初說九十六受我五戒者，次說九十四受持三歸者，後說九十二一稱南無佛。

據實上品修六事法，彼經唯言受我五戒，初會度者。

但舉行者修六中一，威儀不缺，攝上下品生，唯一事故，受持三歸。第二會度者，中三品中，中上品生，具三業故。

一稱南無佛，第三會度者，下三品中下下品攝，唯口念故。

彼經且舉三中各一。粗俗所修，非具顯示，故不相違。

## E02 眾發希願

有二：①眾發希願，②佛記得生。

## F01 眾發希願

有二：①明威儀，②明發願。

### G01 明威儀

說是語時。無量大眾，即從座起，頂禮佛足，禮彌勒足，繞佛及彌勒菩薩百千匝。

從坐起者，表生於彼，從生死起。

禮二足者，捨煩惱故。

繞佛菩薩百千匝者，顯百千生常不離故。

### G02 明發願

未得道者，各發誓願，我等天人八部，今於佛前，發誠實誓。願於未來世，

值遇彌勒。捨此身已，皆得上生兜率陀天。

未得道者，但舉凡夫。聖隨願往，不還無學等神通可往，勵勸末代故，唯舉凡生不談聖往。未來值遇三會得度，捨此身已，方願上生。

## F02 佛記得生

世尊記曰：汝等及未來世，修福持戒，皆當往生彌勒菩薩前，為彌勒菩薩之所攝受。

汝等及未來世下品行者，乃至一念稱彌勒名，皆得生彼。況能修福持戒，上品豈不生！三乘五性，皆度脫故。

## E03 結成正觀

佛告優波離：作是觀者，名為正觀。若他觀者，名為邪觀。

為度末代，殷勤勸往。

### B03 聞名喜行分

有四：①問，②答，③時眾獲益，④喜退流通。

#### C01 問

有二：①讚說隨喜，②正問持名。

#### D01 讚說隨喜

爾時，尊者阿難，即從座起，叉手長跪。白佛言：世尊！善哉，世尊！快說彌勒所有功德，亦記未來世修福眾生所得果報，我今隨喜。

爾時阿難歎凡及聖功德業果，故成前說，皆通二感。

#### D02 正問持名

唯然，世尊！此法之要，云何受持？當何名此經？

唯然者，敬諾之詞。此經要妙，如何受持？行之儀軌，復何名之？

C02 答

有二：1.答受持；2.正答名。

D01 答受持

佛告阿難：汝持佛語，慎勿忘失。為未來世，開生天路，示菩提相，莫斷佛種。

我今滅度，末代無依，故勸受持，勅令不忘，為未來世眾生，近受天中之法樂，捨四趣之淪喪；遠示菩提之妙相，出三界而超驤。經在有植善根法，滅便斷佛種。佛為圓覺，種為慧因。學故慧生，不學故種斷。

## D02 正答持名

此經，名《彌勒菩薩般涅槃》，亦名《觀彌勒菩薩上生兜率陀天勸發菩提心》，如是受持。

說彌勒菩薩涅槃之事，故以為名。示生彼相，令有瞻觀。勸進發心，流通後代。依名釋義，如是受持。受為領納在心，持為任持不忘。

## C03 時眾獲益

有二：一，聖益；後，凡益。

### D01 聖益

佛說是語。

時，他方來會十萬菩薩，得首楞嚴三昧。

## D02 凡益

八萬億諸天，發菩提心，皆願隨從彌勒下生。

不但當時發心，亦願未來隨下。

## C04 喜退流通，得未曾有

佛說是語。時，四部弟子、天龍八部，聞佛所說，皆大歡喜，禮佛而退。

由此歡喜事訖，依教故退流通。

惡果惡因，生於季俗之末。佛前佛後，長居無暇之中。欣淨土則妙行不成，慕天宮乃勝因允就。淨土雖無惡染，聖教自有參差。天宮雖現欲樂，道理定無疑惑。厭塵境者，觸諸染而不染。耽欲樂者，事事不染而染。戒業行缺，福智淺薄。佛既應物機而現穢，凡亦契聖境而欣生。上聖上賢皆為修業，下凡下位

何得越之。故，行同之者皆應專習。率已穿鑿，望充生因。自餘狀跡，具如別傳。

## 觀彌勒菩薩上兜率天經贊

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>